



HYMNI ECCLESIAE,

EXCERPTI

E BREVIARIIS

ROMANO, SARISBURIENSI, EBORACENSI,

ET ALIUNDE.



OXONII:

J. H. PARKER.

MDCCCXXXVIII.

RATIS:
EXCUDEBANT T. COMBE ET SOC.



PRÆFATIO.

NE mirum tibi, Lector benevole, videatur, Hymnos, quos in manibus habes, et materie vetustos et stilo, hodiernis typis et hodiernorum favori esse commendatos. Non enim abs te exigitur, ut quicquid hîc scriptum inveneris, id in sinum tuum recipias illico, absque animi ullâ exercitatione aut judicio tuo. Neque qui totum aliquid edit in publicum, illum oportet universi operis in singula quæque jurare, aut in rerum squalore immorari quòd in antiquitate versatur. Alia nimirùm sunt in monumentis veterum simplicis ac pristinae

naturæ elementa; prorsus aliud concretum vitium, et sordes temporum. Cordati autem hominis est, neque obsoleta pro priscis, nec peregrina pro falsis habere.

Quod quidem optimo consilio actum est olim à patribus nostris, qui, cæco quodam reformationis, quam vocant, æstu in Ecclesiâ passim fervente, è religionibus suis, non quæ exterorum studium posceret, sed quæ vis extorqueret, missa fecerunt; à malesanâ philosophiâ ereptis cæteris, ea concedendo, quæ sanctitatem planè nullam, parem autem invidiam haberent. Hinc illi, quibus nunc utimur, ritus et cæremoniæ; hinc rerum divinarum ordo; hinc et disciplinæ nostræ forma et agendi ratio repetenda est.

Quòd si fiat quæstio, cur diligentissimi viri, cùm nostra omnia retractarent, hymnodiam solùm intactam, et

tanquam desperatam, ne dicam improbatam reliquerint, id vero ex ejusmodi silentio minimè colligendum erit. Nam, cùm statutum esset, ut cultus divinus, eo usque in Latino idiomate absolutus, transiret in vernaculam, quis daret, ut qui possent aliquid in rebus reformandis, ii in poeticâ flourerent simul, verba autem in versum et quæstiones ad veritatis normam, pari solertiâ redigerent? Unde factum est, ut in officiis divinis, dum habemus cætera, hymnos non habeamus.

Quare in hac Ecclesiæ nostræ qualicumque inopiâ, hoc tempore, Lector beneyole, tibi apponenda statuimus illa vel illorum similia, quæ nostri in sæculo decimo sexto, cùm sua essent, de manibus prudenter amiserunt; non illa, ex omni parte approbanda, sed aspersa maculis, ita verò ut modò vix quicquam improbes, modò improbes, at neque ut

rejicias nec tamen ut possis mederi.
Nam quæ tota reprobanda erant, ista
scilicet tota omisimus; cætera subji-
cimus judicio tuo.

J. H. N.





	Pag.
HYMNI E BREVIARIO ROMANO	1
HYMNI E BREVIARIO SARISBURIENSI	89
HYMNI E BREVIARIO EBORACENSI . . .	123
PROSÆ E MISSALI PARISIENSI	135
PROSÆ E PROCESSIONALI EBORACENSI	156





INDEX.

	Pag.
ADAM vetus quod polluit,	126
Ad Jesum accurrite,	135
Ad regias Agni dapes,	41
Æstimavit ortolanum,	109
Æterna cœli gloria, AMBROSII.	21
Æterna Christi munera, AMBROSII.	69
Æterne rerum Conditor, AMBROSII.	5
Æterne Rex altissime, GREGORII.	45
Æterni Patris unice,	132
Agnoscat omne sæculum,	124
Ales diei nuntius, PRUDENTII.	14
Alma chorus Domini nunc pangat nomina summi,	100
Alto ex Olympi vertice,	82
Angulare fundamentum,	102
Antra deserti teneris sub annis, .. PAULI DIACONI.	61
Annue Christe sæculorum Domine,	101
A Patre Unigenitus,	90
A solis ortus cardine, SEDULII.	30
Audi, benigne Conditor,.. AMBROSII, PRUDENTII,	
v. GREGORII.	34
Audit tyrannus anxius,.. .. PRUDENTII.	31
Aurora cœlum purpurat,	43
Aurora jam spargit polum, AMBROSII.	24
Aurora lucis rutilat, AMBROSII.	97
Ave plena gratia,	136
Beata nobis gaudia, HILARII.	49
Chorus novæ Hierusalem,	96
Christe sanctorum decus angelorum,	68
Christe qui lux es et dies,	91
Christe Redemptor omnium, .. AMBROSII.	118
Christi miles gloriosus,	104

	Pag.
Christo profusum sanguinem, ..	73
Clarum decus jejunii,	93
Cœli Deus sanctissime, AMBROSII ?	17
Cœlestis urbs Jerusalem,	81
Cœlestis formam gloriæ,.. .. .	112
Collaudemus Magdalênæ,	108
Consors Paterni luminis, AMBROSII.	13
Corde natus ex parentis,	123
Creator alme siderum,	26
Crudelis Herodes, Deum	32
Cultor Dei memento,	95
Decora lux æternitatis, auream ..	62
Deus, tuorum militum,.. .. . AMBROSII.	72
Dies iræ, dies illa,	150
Ecce jam noctis tenuatur umbra, GREGORII.	6
Ecce tempus idoneum,	92
Egregie doctor Paule, mores instrue ELPIDIS	58
En clara vox redarguit,	28
En noctis medium, surgite properè,	85
Ex more docti mystico, AMBROSII.	35
Exultet Ecclesia,	146
Felix per omnes festum mundi cardines,	129
Festum Matris gloriosæ,.. .. .	105
Fortem virili pectore, SYLVII.	79
Gloria, laus, et honor tibi sit rex Christe redemptor,	152
Hominis superne Conditor,	22
Humani generis,	144
Hymnum canamus gloriæ,	127
Immense cœli Conditor, AMBROSII.	12
Inventor rutili Dux bonæ luminis,	163
Iste confessor Domini, colentes ..	75
Jam Christus astra ascenderat, .. . AMBROSII.	47
Jam lucis orto sidere, AMBROSII.	6
Jam sol recedit igneus,.. .. .	24
Jam ter quaternis trahitur,	126
Jesu, corona celsior, AMBROSII.	77
Jesu, corona Virginum, .. . AMBROSII, vel GREGORII.	78
Jesu, decus angelicum,	57
Jesu, dulcis memoria,	55

INDEX.

xi

	Pag.
Jesu, nostra redemptio,	99
Jesu, quadragenariæ,	94
Jesu, Redemptor omnium,	29
Jesu, Redemptor omnium,	76
Jesu, rex admirabilis,	56
Jesu, salvator sæculi,	98
Jesu, salvator sæculi,	117
Lætabundus,	115
Lauda, mater Ecclesia,	131
Lauda Sion Salvatorem,.. .. .	141
Laudes Deo devotas,	128
Lucis Creator optime,	9
Lustra sex qui jam peregit,	9
AMBROSII? sed vid.	
Hymn. Pange lingua,	39
Lux alma Jesu mentium,	66
Lux ecce surgit aurea,	18
PRUDENTII.	
Magnæ Deus potentiaë,	19
AMBROSII?	
Maria castis oculis	64
Maria ventre concepit,	125
Miris modis repente liber, ferrea,	64
Mundi salus affutura,	106
Nocte surgentes vigilemus omnes,	4
GREGORII.	
Nox atra rerum contegit,	18
AMBROSII.	
Nox, et tenebræ, et nubila,	16
PRUDENTII.	
Nunc sancte nobis Spiritus,	7
AMBROSII.	
O gloriosa virginum,	84
O Maria noli flere,	110
O nata lux de lumine,	113
O nimis felix meritique celsi,	61
PAULI DIACONI.	
O Pater sancte mitis atque pie,	101
O sator rerum, reparator ævi,	113
O sol salutis, intimis	36
O sola magnarum urbium,	33
PRUDENTII.	
Pange lingua gloriosi lauream,	58
FORTUNATI.	
Pange lingua gloriosi corporis,	51
S. T. AQUINATIS.	
Paschale mundo gaudium,	71
Pater superni luminis,	63
BELLARMINI.	
Primo die, quo Trinitas,	3
Præsepe poni pertulit,	125

	Pag.
Quem terra, pontus, sidera,.. ..	FORTUNATI. 83
Quicumque Christum quæritis, ..	PRUDENTII, V. 65
	BERNARDI, 65
Quodcumque in orbe nexibus revinxeris, ..	ELPIDIS. 58
Rector potens, verax Deus,.. ..	AMBROSII. 8
Rerum Creator optime,.. ..	AMBROSII. 15
Rerum Deus tenax vigor,	AMBROSII. 8
Rex gloriose martyrum,	GREGORII. 73
Rex sempiternæ cœlitum,	42
Sacris solemnibus juncta sint gaudia, ..	S. T. AQUINATIS. 52
Salvator mundi, Domine,	103
Salve festidies, toto venerabilis ævo, ..	157, 158, 159, 160, 162
Salvete flores martyrum,	PRUDENTII. 32
Salutis humanæ Sator,	44
Sanctorum meritis inclita gaudia, ..	74
Solemnis hæc festivitas,.. ..	138
Somno reffectis artubus,.. ..	AMBROSII. 10
Splendor Paternæ gloriæ,	AMBROSII. 11
Sponsa Christi quæ per orbem, ..	148
Stabat Mater dolorosa,	153
Summæ Parens clementiæ,	AMBROSII. 23
Summæ Parens clementiæ,	50
Te, Joseph, celebrent agmina cœlitum, ..	59
Telluris alme Conditor,.. ..	AMBROSII. 14
Te lucis ante terminum,	AMBROSII. 9
Te splendor et virtus Patris, ..	67
Tibi Christe, splendor Patris, ..	116
Tristes erant apostoli,	AMBROSII. 70
Tu Trinitatis Unitas,	AMBROSII. 20
Tu Trinitatis Unitas,	50
Ut queant laxis resonare fibris, ..	PAULI DIACONI. 60
Veni, Creator Spiritus,	46
Veni Redemptor gentium,	89
Veni sancte Spiritus,	140
Verbum supernum prodiens, ..	27
Verbum supernum prodiens, ..	53
Vexilla regis prodeunt,	37
Victimæ Paschali,	137



HYMNI

PER HEBDOMADAM

ORDINARII.







HYMNI.

DOMINICA.

AD MATUTINUM.

Per Hyemem.

PRIMO die, quo Trinitas
Beata mundum condidit,
Vel quo resurgens Conditor
Nos morte victa liberat :

Pulsis procul torporibus
Surgamus omnes ocyùs,
Et nocte quæramus Deum,
Propheta sicut præcipit :

Nostras preces ut audiat,
Suamque dextram porrigat,
Et expiatis sordibus
Reddat polorum sedibus.

Ut, quique sacratissimo
Hujus diei tempore
Horis quietis psallimus,
Donis beatis muneret.

Jam nunc paterna claritas
Te postulamus affatim,
Absint faces libidinis,
Et omnis actus noxius.

Ne foeda sit, vel lubrica
Compago nostri corporis,
Ob cujus ignes ignibus
Avernus urat acriùs.

Mundi Redemptor, quæsumus,
Tu probra nostra diluas:
Nobisque largus commoda
Vitæ perennis conferas.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

Per Æstatem.

NOCTE surgentes vigilemus omnes,
Semper in psalmis meditemur, atque
Voce concordi Domino canamus
Dulciter hymnos.

Ut pio Regi pariter canentes,
Cum suis Sanctis mereamur aulam
Ingredi cœli, simul et perennem
Ducere vitam.

Præstet hoc nobis Deitas beata
Patris, ac Nati, pariterque Sancti
Spiritus, cujus resonat per omnem
Gloria mundum.

AD LAUDES.

Per Hyemem.

ÆTERNE rerum conditor,
Noctem diemque qui regis,
Et temporum das tempora,
Ut alleves fastidium.

Nocturna lux viantibus
A nocte noctem segregans,
Præco diei jam sonat,
Jubarque solis evocat.

Hoc excitatus Lucifer
Solvit polum caligine,
Hoc omnis erronum cohors
Viam nocendi deserit.

Hoc nauta vires colligit,
Pontique mitescunt freta:
Hoc, ipsa petra Ecclesiæ,
Canente, culpam diluit.

Surgamus ergo strenuè,
Gallus jacentes excitat,
Et somnolentos increpat,
Gallus negantes arguit.

Gallo canente spes redit,
Ægris salus refunditur,
Mucro latronis conditur,
Lapsis fides revertitur.

Jesu labantes respice,
Et nos videndo corrige:
Si respicis, labes cadunt,
Fletuque culpa solvitur.

Tu lux refulge sensibus,
Mentisque somnum discute :
Te nostra vox primùm sonet,
Et vota solvamus tibi.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

Per Æstatem.

Ecce jam noctis tenuatur umbra,
Lux et auroræ rutilans coruscat,
Supplices rerum Dominum canora
Voce precemur.

Ut reos culpæ miseratus, omnem
Pellat angorem, tribuat salutem,
Donet et nobis bona sempiternæ
Munera pacis.

Præstet hoc nobis Deitas beata
Patris, ac Nati, pariterque sancti
Spiritus, cujus resonat per omnem
Gloria mundum.

Per Hebdomadam.

AD PRIMAM.

JAM lucis orto sidere
Deum precemur supplices,
Ut in diurnis actibus,
Nos servet à nocentibus.

Linguam refrænans temperet,
Ne litis horror insonet :
Visum fovendo contegat,
Ne vanitates hauriat.

Sint pura cordis intima ;
Absistat et vecordia :
Carnis terat superbiam
Potus cibique parcitas :

Ut cùm dies abscesserit,
Noctemque sors reduxerit,
Mundi per abstinentiam
Ipsi canamus gloriam.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

Per Hebdomadam.

AD TERTIAM.

NUNC sancte nobis Spiritus,
Unum Patri cum Filio,
Dignare promptus ingeri
Nostro refusus pectori.

Os, lingua, mens, sensus, vigor
Confessionem personent,
Flammescat igne charitas,
Accendat ardor proximos.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

Per Hebdomadam.

AD SEXTAM.

RECTOR potens, verax Deus,
Qui temperas rerum vices,
Splendore manè illuminas,
Et ignibus meridiem :

Extingue flammæ litium,
Aufer calorem noxium,
Confer salutem corporum,
Veramque pacem cordium.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

Per Hebdomadam.

AD NONAM.

RERUM Deus tenax vigor,
Immotus in te permanens,
Lucis diurnæ tempora
Successibus determinans :

Largire lumen vespere,
Quo vita nusquam decidat,
Sed præmium mortis sacræ
Perennis instet gloria.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD VESPERAS.

LUCIS Creator optime,
Lucem dierum proferens,
Primordiis lucis novæ
Mundi parans originem.

Qui manè junctum vesperi
Diem vocari præcipis,
Illabitur tetrum chaos,
Audi preces cum fletibus.

Ne mens gravata crimine,
Vitæ sit exul munere,
Dum nil perenne cogitat,
Sesegue culpis illigat.

Cœleste pulset ostium :
Vitale tollat præmium :
Vitemus omne noxium,
Purgemus omne pessimum.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

Per Hebdomadam.

AD COMPLETORIUM.

TE lucis ante terminum
Rerum Creator poscimus,
Ut pro tua clementia,
Sis præsul et custodia.

Procul recedant somnia,
Et noctium phantasmata;
Hostemque nostrum comprime,
Ne polluantur corpora.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

FERIA II.

AD MATUTINUM.

SOMNO resectis artubus,
Spreto cubili surgimus;
Nobis, Pater, canentibus
Adesse te deposcimus.

Te lingua primùm concinat,
Te mentis ardor ambiat:
Ut actuum sequentium
Tu, sancte, sis exordium.

Cedant tenebræ lumini:
Et nox diurno sideri:
Ut culpa, quam nox intulit,
Lucis labascat munere.

Precamur iidem supplices,
Noxas ut omnes amputes,
Et ore te canentium
Lauderis omni tempore.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD LAUDES.

SPLENDOR Paternæ gloriæ,
De luce lucem proferens,
Lux lucis, et fons luminis,
Diem dies illuminans :

Verusque sol illabere,
Micans nitore perpeti :
Jubarque sancti Spiritus
Infunde nostris sensibus.

Votis vocemus et Patrem,
Patrem potentis gratiæ,
Patrem perennis gloriæ,
Culpam releget lubricam.

Confirmet actus strenuos,
Dentes retundat invidi.
Causas secundet asperos :
Agenda rectè dirigat.

Mentem gubernet, et regat ;
Sit pura nobis castitas :
Fides calore ferveat :
Fraudis venena nesciat.

Christusque nobis sit cibus,
Potusque noster sit fides,
Læti bibamus sobriam
Profusionem Spiritus.

Lætus dies hic transeat :
Pudor sit ut diluculum :
Fides velut meridies :
Crepusculum mens nesciat.

Aurora lucem provehit,
Cum luce nobis prodeat,
In Patre totus Filius,
Et totus in Verbo Pater.

Deo Patri sit gloria,
Ejusque soli Filio,
Cum Spiritu Paraclito
Nunc, et per omne sæculum.

AD VESPERAS.

IMMENSE cœli Conditor,
Qui mixta ne confunderent,
Aquæ fluenta dividens,
Cœlum dedisti limitem.

Firmans locum cœlestibus,
Simulque terræ rivulis,
Ut unda flammæ temperet,
Terræ solum ne dissipent.

Infunde nunc, piissime,
Donum perennis gratiæ:
Fraudis novæ ne casibus
Nos error atterat vetus.

Lucem Fides adaugeat :
Sic luminis jubar ferat :
Hæc vana cuncta proterat,
Hanc falsa nulla comprimant.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

FERIA III.

AD MATUTINUM.

CONSORS Paterni luminis,
Lux ipse lucis, et dies,
Noctem canendo rumpimus,
Assiste postulantibus.

Aufer tenebras mentium:
Fuga catervas dæmonum;
Expelle somnolentiam,
Ne pigritantes obruat.

Sic Christe nobis omnibus
Indulgeas credentibus,
Ut prosit exorantibus,
Quod præcinentes psallimus.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD LAUDES.

ALES diei nuntius
Lucem propinquam præcinit,
Nos excitator mentium
Jam Christus ad vitam vocat.

Auferte, clamat, lectulos,
Ægro sopore desides :
Castique, recti, ac sobrii
Vigilate : jam sum proximus.

Jesum ciamus vocibus,
Flentes, precantes, sobrii :
Intenta supplicatio
Dormire cor mundum vetat.

Tu Christe somnum discute :
Tu rumpe noctis vincula :
Tu solve peccatum vetus,
Novumque lumeningere.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

AD VESPERAS.

TELLURIS alme Conditor,
Mundi solum qui separans,
Pulsis aquæ molestiis,
Terram dedisti immobilem :

Ut germen aptum proferens,
Fulvis decora floribus,
Fecunda fructu sisteret,
Pastumque gratum redderet.

Mentis perustæ vulnera
Munda virore gratiæ:
Ut facta fletu diluat,
Motusque pravos atterat.

Jussis tuis obtemperet:
Nullis malis approximet:
Bonis repleri gaudeat,
Et mortis ictum nesciat.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

FERIA IV.

AD MATUTINUM.

RERUM Creator optime,
Rectorque noster, aspice;
Nos à quiete noxia
Mersos sopore libera.

Te, sancte Christe, poscimus:
Ignosce culpis omnibus:
Ad confitendum surgimus,
Morasque noctis rumpimus.

Mentes manusque tollimus,
Propheta sicut noctibus
Nobis gerendum præcipit,
Paulusque gestis censuit.

Vides malum quod fecimus :
Occulta nostra pandimus :
Preces gementes fundimus,
Dimitte quod peccavimus.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD LAUDES.

Nox, et tenebræ, et nubila,
Confusa mundi, et turbida :
Lux intrat : albescit polus :
Christus venit : discedite.

Caligo terræ scinditur
Percussa solis spiculo,
Rebusque jam color redit,
Vultu nitentis sideris.

Te, Christe, solum novimus,
Te mente pura, et simplici,
Flendo, et canendo, quæsumus,
Intende nostris sensibus.

Sunt multa fucis illita,
Quæ luce purgentur tua :
Tu vera lux cœlestium
Vultu sereno illumina.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

AD VESPERAS.

CÆLI Deus sanctissime,
Qui lucidas mundi plagas
Candore pingis igneo,
Augens decoro lumine :

Quarto die qui flammeam
Dum solis accendis rotam ;
Lunæ ministras ordinem,
Vagosque cursus siderum :

Ut noctibus, vel lumini
Diremptionis terminum,
Primordiis et mensium
Signum dares notissimum.

Expelle noctem cordium :
Absterge sordes mentium :
Resolve culpæ vinculum :
Everte moles criminum.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

FERIA V.

AD MATUTINUM.

Nox atra rerum contegit
Terræ colores omnium ;
Nos confitentes poscimus
Te, juste Judex cordium,
Ut auferas piacula,
Sordesque mentis abluas,
Donesque, Christe, gratiam,
Ut arceantur crimina.

Mens ecce torpet impia,
Quam culpa mordet noxia :
Obscura gestit tollere,
Et te, Redemptor, quærere.

Repelle tu caliginem
Intrinsecus quàm maximè ;
Ut in beato gaudeat
Se collocari lumine.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD LAUDES.

Lux ecce surgit aurea :
Pallens facessat cæcitas,
Quæ nosmet in præceps diu
Errore traxit devio.

Hæc lux serenum conferat,
Purosque nos præstet sibi;
Nihil loquamur subdolum:
Volvamus obscurum nihil.

Sic tota decurrat dies,
Ne lingua mendax, ne manus,
Oculive peccent lubrici,
Ne noxa corpus inquinet.

Speculator adstat desuper,
Qui nos diebus omnibus,
Actusque nostros prospicit
A luce prima in vesperum.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

AD VESPERAS.

MAGNÆ Deus potentiae,
Qui fertili natos aqua
Partim relinquis gurgiti,
Partim levas in aëra.

Demersa lymphis imprimens,
Subvecta coelis erigens:
Ut stirpe ab una prodita,
Diversa repleant loca.

Largire cunctis servulis,
Quos mundat unda sanguinis,
Nescire lapsus criminum,
Nec ferre mortis tædium.

Ut culpa nullum deprimat;
Nullum efferat jactantia:
Elisa mens ne concidat:
Elata mens ne corruat.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

FERIA VI.

AD MATUTINUM.

Tu Trinitatis Unitas,
Orbem potenter quæ regis,
Attende laudis canticum,
Quod excubantes psallimus.

Nam lectulo consurgimus
Noctis quieto tempore,
Ut flagitemus omnium
A te medelam vulnerum.

Quò fraude quidquid dæmonum
In noctibus deliquimus;
Abstergat illud cœlitus
Tuæ potestas gloriæ.

Ne corpus adstet sordidum,
Nec torpor instet cordium,
Nec criminis contagio
Tepescat ardor spiritus.

Ob hoc Redemptor, quæsumus,
Reple tuo nos lumine,
Per quod dierum circulis,
Nullis ruamus actibus.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD LAUDES.

ÆTERNA cœli gloria,
Beata spes mortalium,
Summi Tonantis Unice,
Castæque proles Virginis :

Da dexteram surgentibus,
Exurgat ut mens sobria,
Flagrans et in laudem Dei
Grates rependat debitas.

Ortus refulget lucifer,
Præitque solem nuntius :
Cadunt tenebræ noctium :
Lux sancta nos illuminet :

Manensque nostris sensibus,
Noctem repellat sæculi,
Omni fine temporis
Purgata servet pectora.

Quæsita jam primùm Fides
In corde radices agat,
Secunda Spes congaudeat,
Qua major extat Charitas.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

AD VESPERAS.

HOMINIS superne Conditor,
Qui cuncta solus ordinans,
Humum jubes producere
Reptantis et feræ genus :

Et magna rerum corpora,
Dictu jubentis vivida,
Per temporum certas vices
Obtemperare servulis :

Repelle, quod cupidinis
Ciente vi nos impetit,
Aut moribus se suggerit,
Aut actibus se interserit.

Da gaudiorum præmia,
Da gratiarum munera :
Dissolve litis vincula,
Adstringe pacis fœdera.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.



SABBATO.

AD MATUTINUM.

SUMMÆ Parens clementiæ,
Mundi regis qui machinam,
Unius et substantiæ,
Trinusque personis Deus.

Nostros pius cum canticis
Fletus benignè suscipe;
Ut corde puro sordium
Te perfruamur largiùs.

Lumbos, jecurque morbidum
Flammis adure congruis;
Accincti ut artus excubent
Luxu remoto pessimo.

Quicumque ut horas noctium
Nunc concinendo rumpimus,
Ditemur omnes affatim
Donis beatæ patriæ.

Præsta, Pater piissime,
Patrique compar Unice,
Cum Spiritu Paraclito
Regnans per omne sæculum.

AD LAUDES.

AURORA jam spargit polum :
Terris dies illabitur :
Lucis resultat spiculum :
Discedat omne lubricum.

Phantasma noctis exulet :
Mentis reatus corruat :
Quidquid tenebris horridum
Nox attulit culpæ, cadat.

Ut manè, quod nos ultimum
Hîc deprecamur cernui ;
Cum luce nobis effluat,
Hoc dum canore concrepat.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

AD VESPERAS.

JAM sol recedit igneus,
Tu lux perennis Unitas,
Nostris, beata Trinitas,
Infunde lumen cordibus.

Te manè laudum carmine,
Te deprecamur vespere :
Digneris, ut te supplices
Laudemus inter Cœlites.

Patri, simulque Filio,
Tibique sancte Spiritus,
Sicut fuit, sit jugiter
Sæclum per omne gloria.





HYMNI DE TEMPORE.

SABBATO ANTE DOMINICAM I. ETC. ADVENTUS.

AD VESPERAS.

CREATOR alme siderum,
Æterna lux credentium,
Jesu Redemptor omnium,
Intende votis supplicum.

Qui dæmonis ne fraudibus
Periret orbis, impetu
Amoris actus, languidi
Mundi medela factus es.

Commune qui mundi nefas
Ut expiares, ad crucem
E Virginis Sacrario
Intacta prodixit victima.

Cujus potestas gloriæ,
Nomenque cùm primùm sonat,
Et Cœlites, et inferi
Tremante curvantur genu.

Te deprecamur ultimæ
Magnum diei Judicem;
Armis supernæ gratiæ
Defende nos ab hostibus.

Virtus, honor, laus, gloria,
Deo Patri, cum Filio,
Sancto simul Paraclito,
In sæculorum sæcula.

PER ADVENTUM.

AD MATUTINUM.

VERBUM supernum prodiens
E Patris æterni sinu,
Qui natus orbi subvenis,
Labente cursu temporis;

Illumina nunc pectora,
Tuoque amore concrema;
Ut cor caduca deserens
Cœli voluptas impleat.

Ut cùm tribunal Judicis
Damnabit igni noxios,
Et vox amica debitum
Vocabit ad cœlum pios;

Non esca flammæ nigræ
Volvamur inter turbines,
Vultu Dei sed compotes
Cœli fruamur gaudiis.

Patri, simulque Filio,
Tibique sancte Spiritus,
Sicut fuit, sit jugiter
Sæclum per omne gloria.

AD LAUDES.

EN clara vox redarguit
Obscura quæque personans:
Procul fugentur somnia:
Ab alto Jesus promicat.

Mens jam resurgat torpida,
Non ampliùs jacens humi:
Sidus refulget jam novum,
Ut tollat omne noxium.

En Agnus ad nos mittitur
Laxare gratis debitum:
Omnes simul cum lacrymis
Precemur indulgentiam:

Ut cùm secundò fulserit,
Metuque mundum cinxerit,
Non pro reatu puniat,
Sed nos pius tunc protegat.

Virtus, honor, laus, gloria
Deo Patri cum Filio,
Sancto simul Paraclito,
In sæculorum sæcula.

IN NATIVITATE DOMINI.

AD VESPERAS.

JESU Redemptor omnium,
Quem lucis ante originem
Parem Paternæ gloriæ
Pater supremus edidit.

Tu lumen, et splendor Patris,
Tu spes perennis omnium,
Intende quas fundunt preces
Tui per orbem servuli.

Memento, rerum Conditor,
Nostri quòd olim corporis,
Sacrata ab alvo Virginis
Nascendo, formam sumpseris.

Testatur hoc præsens dies
Currrens per anni circulum,
Quòd solus è sinu Patris
Mundi salus adveneris.

Hunc astra, tellus, æquora,
Hunc omne, quod cœlo subest,
Salutis Auctorem novæ
Novo salutat cantico.

Et nos, beata quos sacri
Rigavit unda sanguinis,
Natalis ob diem tui
Hymni tributum solvimus.

Jesu, tibi sit gloria,
 Qui natus es de Virgine,
 Cum Patre et almo Spiritu,
 In sempiterna sæcula.

AD LAUDES.

A SOLIS ortus cardine
 Ad usque terræ limitem,
 Christum canamus Principem,
 Natum Maria Virgine.

Beatus auctor sæculi
 Servile corpus induit:
 Ut carne carnem liberans,
 Ne perderet quos condidit.

Castæ Parentis viscera
 Cœlestis intrat gratia:
 Venter Puellæ bajulat
 Secreta, quæ non noverat.

Domus pudici pectoris
 Templum repentè fit Dei:
 Intacta nesciens virum,
 Conceptit alvo Filium.

Enititur puerpera,
 Quem Gabriel prædixerat,
 Quem ventre matris gestiens,
 Baptista clausum senserat.

Fœno jacere pertulit:
 Præsepe non abhorruit:
 Et lacte modico pastus est,
 Per quem nec ales esurit.

Gaudet chorus cœlestium,
Et angeli canunt Deo :
Palamque fit pastoribus
Pastor, Creator omnium.

Jesu, tibi sit gloria,
Qui natus es de Virgine,
Cum Patre et almo Spiritu,
In sempiterna sæcula.

IN FESTO SS. INNOCENTII.

AD MATUTINUM.

AUDIT tyrannus anxius
Adesse regum Principem,
Qui nomen Israël regat,
Teneatque David regiam.

Exclamat amens nuntio :
Successor instat, pellimur :
Satelles i, ferrum rape :
Perfunde cunas sanguine.

Quid proficit tantum nefas ?
Quid crimen Herodem juvat ?
Unus tot inter funera
Impunè Christus tollitur.

Jesu, tibi sit gloria,
Qui natus es de Virgine,
Cum Patre et almo Spiritu,
In sempiterna sæcula.

AD LAUDES.

SALVETE flores Martyrum,
Quos lucis ipso in limine
Christi insecutor sustulit,
Ceu turbo nascentes rosas.

Vos prima Christi victima,
Grex immolatorum tener,
Aram sub ipsam simplices
Palma et coronis luditis.

Jesu, tibi sit gloria,
Qui natus es de Virgine,
Cum Patre et almo Spiritu,
In sempiterna sæcula.

IN EPIPHANIA DOMINI.

AD VESPERAS.

CRUELIS Herodes, Deum
Regem venire quid times?
Non eripit mortalia,
Qui regna dat cœlestia.

Ibant Magi, quam viderant,
Stellam sequentes præviam:
Lumen requirunt lumine,
Deum fatentur munere.

Lavacra puri gurgitis
 Cœlestis Agnus attigit,
 Peccata, quæ non detulit,
 Nos abluendo sustulit.

Novum genus potentiæ:
 Aquæ rubescunt hydriæ,
 Vinumque jussa fundere,
 Mutavit unda originem.

Jesu, tibi sit gloria,
 Qui apparuisti gentibus,
 Cum Patre et almo Spiritu,
 In sempiterna sæcula.

AD LAUDES.

O SOLA magnarum urbium
 Major Bethlem, cui contigit
 Ducem salutis cœlitus
 Incorporatum gignere:

Quem stella, quæ solis rotam
 Vincit decore ac lumine,
 Venisse terris nuntiat
 Cum carne terrestri Deum.

Videre postquam illum Magi,
 Eoa promunt munera;
 Stratique votis offerunt
 Thus, myrrham, et aurum regium.

Regem Deumque annuntiant
 Thesaurus et fragrans odor
 Thuris Sabæi; ac myrrheus
 Pulvis sepulchrum prædocet.

Jesu, tibi sit gloria,
Qui apparuisti gentibus,
Cum Patre et almo Spiritu,
In sempiterna sæcula.

PER QUADRAGESIMAM.

SABBATO.

AD VESPERAS.

AUDI, benigne Conditor,
Nostras preces cum fletibus,
In hoc sacro jejunio
Fusas quadragenario.

Scrutator alme cordium,
Infirma tu scis virium:
Ad te reversis exhibe
Remissionis gratiam.

Multùm quidem peccavimus,
Sed parce confitentibus:
Ad nominis laudem tui
Confer medelam languidis.

Concede nostrum conteri
Corpus per abstinentiam:
Culpæ ut relinquant pabulum
Jejuna corda criminum.

Præsta beata Trinitas,
Concede simplex Unitas,
Ut fructuosa sint tuis
Jejuniorum munera.

DOMINICA.

AD MATUTINUM.

Ex more docti mystico
Servemus hoc jejunium,
Deno dierum circulo
Ducto quater notissimo.

Lex et Prophetæ primitus
Hoc prætulerunt, postmodum
Christus sacravit, omnium
Rex atque Factor temporum.

Utamur ergo parcitùs
Verbis, cibis, et potibus,
Somno, jocis, et arctiùs
Perstemus in custodia.

Vitemus autem noxia,
Quæ subruunt mentes vagas,
Nullumque demus callidi
Hostis locum tyrannidi.

Flectamus iram vindicem,
Ploremus ante Judicem,
Clamemus ore supplici,
Dicamus omnes cernui :

Nostris malis offendimus
 Tuam Deus clementiam :
 Effunde nobis desuper
 Remissor indulgentiam.

Memento quòd sumus tui,
 Licet caduci, plasmatis :
 Ne des honorem nominis .
 Tui, precamur, alteri.

Laxa malum quod fecimus,
 Auge bonum quod poscimus ;
 Placere quò tandem tibi
 Possimus hîc, et perpetim.

Præsta beata Trinitas,
 Concede simplex Unitas ;
 Ut fructuosa sint tuis
 Jejuniorum munera.

AD LAUDES.

O SOL salutis, intîmis
 Jesu refulge mentibus,
 Dum nocte pulsa gratior
 Orbi dies renascitur.

Dans tempus acceptabile,
 Da, lachrymarum rivulis
 Lavare cordis victimam,
 Quam læta adurat Charitas.

Quo fonte manavit nefas,
 Fluent perennes lacrymæ,
 Si virga pœnitentiæ
 Cordis rigorem conterat.

Dies venit, dies tua,
In qua reflorent omnia :
Lætetur et nos in viam
Tua reducti dextera.

Te prona mundi machina
Clemens adoret Trinitas,
Et nos novi per gratiam
Novum canamus canticum.

SABBATO ANTE DOMINICAM PASSIONIS.

AD VESPERAS.

VEXILLA regis prodeunt,
Fulget crucis mysterium,
Qua vita mortem pertulit,
Et morte vitam protulit.

Quæ vulnerata lanceæ
Mucrone diro, criminum
Ut nos lavaret sordibus,
Manavit unda et sanguine.

Impleta sunt, quæ concinit
David fideli carmine,
Dicendo nationibus :
Regnavit à ligno Deus.

Arbor decora et fulgida,
Ornata regis purpura,
Electa digno stipite
Tam sancta membra tangere.

Beata, cujus brachiis
 Pretium pependit sæculi,
 Statera facta corporis,
 Tulitque prædam tartari.*

Te, fons salutis Trinitas,
 Collaudet omnis spiritus:
 Quibus crucis victoriam
 Largiris, adde præmium.

DOMINICA DE PASSIONE,

Et infra Hebdomadam Passionis.

AD MATUTINUM.

PANGE lingua gloriosi
 Lauream certaminis,
 Et super crucis trophæo
 Dic triumphum nobilem:
 Qualiter Redemptor orbis
 Immolatus vicerit.

De Parentis protoplasti
 Fraude Factor condolens,
 Quando pomi noxialis
 In necem morsu ruit:
 Ipse lignum tunc notavit,
 Damna ligni ut solveret.

* O crux ave spes unica,
 Hoc passionis tempore
 Piis adauge gratiam,
 Reisque dele crimina.

Hoc opus nostræ salutis
 Ordo depoposcerat;
 Multiformis proditoris
 Ars ut artem falleret,
 Et medelam ferret inde,
 Hostis unde læserat.

Quando venit ergo sacri
 Plenitudo temporis,
 Missus est ab arce Patris
 Natus, orbis Conditor;
 Atque ventre Virginali
 Carne amictus prodiit.

Vagit infans inter arcta
 Conditus præsepia;
 Membra pannis involuta
 Virgo Mater alligat;
 Et Dei manus, pedesque,
 Stricta cingit fascia.

Sempiterna sit beatæ
 Trinitati gloria,
 Æqua Patri, Filioque:
 Par decus Paraclito:
 Unius Trinique nomen
 Laudet universitas.

AD LAUDES.

LUSTRA sex qui jam peregit,
 Tempus implens corporis,
 Sponte libera Redemptor,
 Passioni deditus,
 Agnus in crucis levatur
 Immolandus stipite.

Felle potus ecce languet:
 Spina, clavi, lancea
 Mite corpus perforarunt:
 Unda manat, et cruor:
 Terra, pontus, astra, mundus,
 Quo lavantur flumine!

Crux fidelis, inter omnes
 Arbor una nobilis:
 Silva talem nulla profert
 Fronde, flore, germine:
 Dulce ferrum, dulce lignum,
 Dulce pondus sustinent.

Flecte ramos arbor alta,
 Tensa laxa viscera,
 Et rigor lentescat ille,
 Quem dedit nativitas,
 Et superni membra Regis
 Tende miti stipite.

Sola digna tu fuisti
 Ferre mundi victimam:
 Atque portum præparare
 Arca mundo naufrago,
 Quam sacer cruor perunxit,
 Fusus Agni corpore.

Sempiterna sit beatæ
 Trinitati gloria,
 Æqua Patri, Filioque,
 Par decus Paraclito:
 Unius Trinique nomen
 Laudet universitas.

SABBATO IN ALBIS,

Et per Tempus Paschale.

AD VESPERAS.

Ad regias Agni dapes
 Stolis amicti candidis
 Post transitum maris Rubri
 Christo canamus Principi :

Divina cujus charitas
 Sacrum propinat sanguinem,
 Almique membra corporis
 Amor Sacerdos immolat.

Sparsum cruorem postibus
 Vastator horret angelus :
 Fugitque divisum mare :
 Merguntur hostes fluctibus.

Jam Pascha nostrum Christus est,
 Paschalis idem victima,
 Et pura puris mentibus
 Sinceritatis azyma.

O vera cœli victima,
 Subjecta cui sunt tartara,
 Soluta mortis vincula,
 Recepta vitæ præmia.

Victor subactis inferis
 Trophæa Christus explicat,
 Cœloque aperto, subditum
 Regem tenebrarum trahit.

Ut sis perenne mentibus,
Paschale Jesu gaudium :
A morte dira criminum
Vitæ renatos libera.

Deo Patri sit gloria,
Et Filio, qui à mortuis
Surrexit, ac Paraclito,
In sempiterna sæcula.

DOMINICA IN ALBIS,

Et per Tempus Paschale.

AD MATUTINUM.

REX sempiterne cœlitum,
Rerum Creator omnium,
Æqualis ante sæcula
Semper Parenti Filius.

Nascente qui mundo Faber
Imaginem vultus tui
Tradens Adamo, nobilem
Limo jugasti spiritum.

Cùm livor et fraus dæmonis
Fœdasset humanum genus :
Tu carne amictus, perditam
Formam reformas artifex.

Qui natus olim è Virgine,
Nunc è sepulchro nasceris,
Tecumque nos à mortuis
Jubes sepultos surgere.

Qui pastor æternus gregem
 Aqua lavas Baptismatis:
 Hæc est lavacrum mentium:
 Hæc est sepulchrum criminum.

Nobis diu qui debitæ
 Redemptor affixus cruci,
 Nostræ dedisti prodigus
 Pretium salutis sanguinem.

Ut sis perenne mentibus
 Paschale Jesu gaudium:
 A morte dira criminum
 Vitæ renatos libera.

Deo Patri sit gloria,
 Et Filio, qui à mortuis
 Surrexit, ac Paraclito,
 In sempiterna sæcula.

AD LAUDES.

AURORA cœlum purpurat,
 Æther resultat laudibus,
 Mundus triumphans jubilat,
 Horrens avernus infremit:

Rex ille dum fortissimus
 De mortis inferno specu
 Patrum Senatum liberum
 Educit ad vitæ jubar.

Cujus sepulchrum plurimo
 Custode signabat lapis,
 Victor triumphat, et suo
 Mortem sepulchro funerat.

Sat funeri, sat lacrymis,
Sat est datum doloribus:
Surrexit extincor necis,
Clamat coruscans angelus.

Ut sis perenne mentibus
Paschale Jesu gaudium;
A morte dira criminum
Vitæ renatos libera.

Deo Patri sit gloria,
Et Filio, qui à mortuis
Surrexit, ac Paraclito,
In sempiterna sæcula.

IN ASCENSIONE DOMINI.

AD VESPERAS.

SALUTIS humanæ Sator,
Jesu voluptas cordium,
Orbis redempti Conditor,
Et casta lux amantium.

Qua victus es clementia,
Ut nostra ferres crimina?
Mortem subires innocens,
A morte nos ut tolleres?

Perrumpis infernum chaos,
Vinctis catenas detrahis;
Victor triumpho nobili
Ad dexteram Patris sedes.

Te cogat indulgentia,
 Ut damna nostra sarcias,
 Tuique vultus compotes
 Dites beato lumine.

Tu dux ad astra, et semita,
 Sis meta nostris cordibus,
 Sis lacrymarum gaudium,
 Sis dulce vitæ præmium.

Jesu, tibi sit gloria,
 Qui victor in cœlum redis,
 Cum Patre et almo Spiritu,
 In sempiterna sæcula.

AD MATUTINUM.

ÆTERNE Rex altissime,
 Redemptor et fidelium,
 Cui mors perempta detulit
 Summæ triumphum gloriæ;

Ascendis orbes siderum,
 Quò te vocabat cœlitus
 Collata, non humanitus
 Rerum potestas omnium.

Ut trina rerum machina,
 Cœlestium, terrestrium,
 Et inferorum condita,
 Flectat genu jam subdita.

Tremunt videntes angeli
 Versam vicem mortalium:
 Peccat caro, mundat caro,
 Regnat Deus Dei caro.

46 IN FESTO PENTECOSTES.

Sis ipse nostrum gaudium,
Manens olympto præmium;
Mundi regis qui fabricam,
Mundana vincens gaudia.

Hinc te precantes quæsumus,
Ignosce culpis omnibus,
Et corda sursum subleva
Ad te superna gratia :

Ut cùm repentè cœperis
Clarere nube Judicis,
Pœnas repellas debitas,
Reddas coronas perditas.

Jesu, tibi sit gloria,
Qui victor in cœlum redis,
Cum Patre et almo Spiritu,
In sempiterna sæcula.

IN FESTO PENTECOSTES.

AD VESPERAS.

VENI, Creator Spiritus,
Mentes tuorum visita,
Imple superna gratia,
Quæ tu creasti, pectora.

Qui diceris Paraclitus,
Altissimi donum Dei,
Fons vivus, ignis, charitas,
Et spiritalis unctio.

Tu septiformis munere,
 Digitus Paternæ dexteræ,
 Tu ritè promissum Patris,
 Sermone ditans guttura.

Accende lumen sensibus,
 Infunde amorem cordibus,
 Infirma nostri corporis
 Virtute firmans perpeti.

Hostem repellas longiùs,
 Pacemque dones protinus;
 Ductore sic te prævio
 Vitemus omne noxium.

Per te sciamus da Patrem,
 Noscamus atque Filium;
 Teque utriusque Spiritum
 Credamus omni tempore.

Deo Patri sit gloria,
 Et Filio, qui à mortuis
 Surrexit, ac Paraclito,
 In sæculorum sæcula.

DOMINICA PENTECOSTES.

AD MATUTINUM.

JAM Christus astra ascenderat,
 Reversus unde venerat,
 Patris fruendum munere
 Sanctum daturus Spiritum.

Solemnis urgebat dies,
 Quo mystico septemplici
 Orbis volutus septies
 Signat beata tempora.

Cùm lucis hora tertia
 Repentè mundus intonat,
 Apostolis orantibus
 Deum venire nuntiat.

De Patris ergo lumine
 Decorus ignis almus est,
 Qui fida Christi pectora
 Calore Verbi compleat.

Impleta gaudent viscera,
 Afflata sancto Spiritu,
 Vocesque diversas sonant,
 Fantur Dei magnalia.

Notique cunctis Gentibus,
 Græcis, Latinis, Barbaris,
 Simulque demirantibus,
 Linguis loquuntur omnium.

Judæa tunc incredula,
 Vesana torvo spiritu,
 Madere musto sobrios
 Christi fideles increpat.

Sed editis miraculis,
 Occurrit, et docet Petrus,
 Falsum profari perfidos,
 Joële teste comprobans.

Deo Patri sit gloria,
 Et Filio, qui à mortuis
 Surrexit, ac Paraclito,
 In sæculorum sæcula.

AD LAUDES.

BEATA nobis gaudia
Anni reduxit orbita,
Cum Spiritus Paraclitus
Illapsus est Apostolis.

Ignis vibrante lumine
Linguæ figuram detulit,
Verbis ut essent proflui,
Et charitate fervidi.

Linguis loquuntur omnium :
Turbæ pavent Gentilium :
Musto madere deputant,
Quos Spiritus repleverat.

Patrata sunt hæc mysticè,
Paschæ peracto tempore,
Sacro dierum circulo,
Quo lege fit remissio.

Te nunc Deus piissime,
Vultu precamur cernuo,
Illapsa nobis cœlitus
Largire dona Spiritus.

Dudum sacrata pectora
Tua replesti gratia :
Dimitte nostra crimina,
Et da quietâ tempora.

Deo Patri sit gloria,
Et Filio, qui à mortuis
Surrexit, ac Paraclito,
In sæculorum sæcula.

IN FESTO SS. TRINITATIS.

AD MATUTINUM.

SUMMÆ Parens clementiæ,
Mundi regis qui machinam,
Unius et substantiæ,
Trinusque personis Deus.

• Da dexteram surgentibus,
Exurgat ut mens sobria,
Flagrans et in laudem Dei
Grates rependat debitas.

Deo Patri sit gloria,
Natoque Patris Unico,
Cum Spiritu Paraclito
In sempiterna sæcula.

AD LAUDES.

Tu Trinitatis Unitas,
Orbem potenter quæ regis,
Attende laudis canticum,
Quod excubantes psallimus.

Ortus refulget lucifer,
Præitque solem nuntius :
Cadunt tenebræ noctium :
Lux sancta nos illuminet.

IN FESTO CORPORIS CHRISTI. 51

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.

IN FESTO CORPORIS CHRISTI.

AD VESPERAS.

PANGE lingua gloriosi
Corporis mysterium,
Sanguinisque pretiosi,
Quem in mundi pretium
Fructus ventris generosi
Rex effudit gentium.

Nobis datus, nobis natus
Ex intacta Virgine,
Et in mundo conversatus,
Sparso verbi semine,
Sui moras incolatus
Miro clausit ordine.

In supremæ nocte cœnæ
Recumbens cum fratribus,
Observata lege plenè
Cibis in legalibus,
Cibum turbæ duodenæ
Se dat suis manibus.

Verbum caro, panem verum
 Verbo carnem efficit:
 Fitque sanguis Christi merum,
 Et si sensus deficit:
 Ad firmandum cor sincerum
 Sola fides sufficit.

Tantum ergo Sacramentum
 Veneremur cernui:
 Et antiquum documentum
 Novo cedat ritui:
 Præstet fides supplementum
 Sensuum defectui.

Genitori, Genitoque
 Laus et jubilatio,
 Salus, honor, virtus quoque
 Sit et benedictio;
 Procedenti ab utroque
 Compar sit laudatio.

AD MATUTINUM.

SACRIS solemniis juncta sint gaudia,
 Et ex præcordiis sonent præconia;
 Recedant vetera, nova sint omnia,
 Corda, voces, et opera.

Noctis recolitur cœna novissima,
 Qua Christus creditur agnum et azyma
 Dedisse fratribus, juxta legitima
 Priscis indulta patribus.

Post agnum typicum, expletis epulis,
 Corpus Dominicum datum discipulis,
 Sic totum omnibus, quod totum sin-
 Ejus fatemur manibus. [gulis,

Dedit fragilibus corporis ferculum,
Dedit et tristibus sanguinis poculum,
Dicens, Accipite quod trado vasculum,
Omnes ex eo bibite.

Sic sacrificium istud instituit,
Cujus officium committi voluit
Solis presbyteris, quibus sic congruit,
Ut sumant, et dent ceteris.

Panis angelicus fit panis hominum :
Dat panis coelicus figuris terminum :
O res mirabilis, manducat Dominum
Pauper, servus, et humilis.

Te trina Deitas unaque poscimus,
Sic nos tu visita, sicut te colimus :
Per tuas semitas duc nos quò tendimus,
Ad lucem, quam inhabitas.

AD LAUDES.

VERBUM supernum prodiens,
Nec Patris linquens dexteram,
Ad opus suum exiens,
Venit ad vitæ vesperam.

In mortem à discipulo
Suis tradendus æmulis,
Priùs in vitæ ferculo
Se tradidit discipulis.

Quibus sub bina specie
Carnem dedit et sanguinem :
Ut duplicis substantiæ
Totum cibaret hominem.

Se nascens dedit socium,
Convalescens in edulium,
Se moriens in pretium,
Se regnans dat in præmium.

O salutaris Hostia,
Quæ cœli pandis ostium:
Bella premunt hostilia,
Da robur, fer auxilium.

Uni trinoque Domino
Sit sempiterna gloria:
Qui vitam sine termino
Nobis donet in patria.





PROPRIUM SANCTORUM.

IN FESTO SANCTISSIMI NOMINIS JESU.

AD VESPERAS.

JESU dulcis memoria,
Dans vera cordi gaudia :
Sed super mel, et omnia,
Ejus dulcis præsentia.

Nil canitur suavius,
Nil auditur jucundius,
Nil cogitatur dulcius,
Quàm Jesus Dei Filius.

Jesu spes pœnitentibus,
Quàm pius es petentibus !
Quàm bonus te quærentibus !
Sed quid invenientibus ?

Nec lingua valet dicere,
Nec littera exprimere :
Expertus potest credere,
Quid sit Jesum diligere.

Sis Jesu nostrum gaudium,
 Qui es futurus præmium:
 Sit nostra in te gloria,
 Per cuncta semper sæcula.

AD MATUTINUM.

JESU Rex admirabilis,
 Et triumphator nobilis,
 Dulcedo ineffabilis,
 Totus desiderabilis.

Quando cor nostrum visitas,
 Tunc lucet ei veritas,
 Mundi vilescit vanitas,
 Et intus fervet charitas.

Jesu dulcedo cordium,
 Fons vivus, lumen mentium,
 Excedens omne gaudium,
 Et omne desiderium.

Jesum omnes agnoscite,
 Amorem ejus poscite;
 Jesum ardenter quærite,
 Quærendo inardescite.

Te nostra Jesu vox sonet,
 Nostri te mores exprimant;
 Te corda nostra diligant,
 Et nunc, et in perpetuum.

AD LAUDES.

JESU, decus angelicum,
In aure dulce canticum,
In ore mel mirificum,
In corde nectar cœlicum.

Qui te gustant, esuriunt,
Qui bibunt, adhuc sitiunt,
Desiderare nesciunt,
Nisi Jesum, quem diligunt.

O Jesu mi dulcissime,
Spes suspirantis animæ!
Te quærunt piæ lacrymæ,
Te clamor mentis intimæ.

Mane nobiscum Domine,
Et nos illustra lumine,
Pulsa mentis caligine,
Mundum reple dulcedine.

Jesu, flos Matris Virginis,
Amor nostræ dulcedinis,
Tibi laus, honor nominis,
Regnum beatitudinis.

IN FESTO CATHEDRÆ S. PETRI.

AD VESPERAS.

QUODCUMQUE in orbe nexibus revinxeris,
Erit revinctum, Petre, in arce siderum :
Et quod resolvit hîc potestas tradita,
Erit solutum cœli in alto vertice :
In fine mundi judicabis sæculum.

Patri perenne sit per ævum gloria,
Tibique laudes concinamus inclytas,
Æterne Nate : sit superne Spiritus
Honor tibi decusque : sancta jugiter
Laudetur omne Trinitas per sæculum.

IN CONVERSIONE S. PAULI
APOSTOLI.

AD VESPERAS.

EGREGIE Doctor Paule mores instrue,
Et nostra tecum pectora in cœlum trahe :
Velata dum meridiem cernat Fides,
Et solis instar sola regnet Charitas.

Sit Trinitati sempiterna gloria,
Honor, potestas, atque jubilatio,
In unitate quæ gubernat omnia,
Per universa æternitatis sæcula.

IN FESTO
S. JOSEPH CONFESSORIS.

IN UTRISQUE VESPERIS.

TE, Joseph, celebrent agmina cœlitum,
Te cuncti resonent Christiadum chori,
Qui clarus meritis, junctus es inclytæ
Casto fœdere Virgini.

Almo cùm tumidam germine conjugem
Admirans, dubio tangeris anxius,
Afflatu superi Flaminis Angelus
Conceptum puerum docet.

Tu natum Dominum stringis, ad exteras
Ægypti profugum tu sequeris plagas;
Amissum Solymis quæris, et invenis,
Miscens gaudia fletibus.

Post mortem reliquos mors pia consecrat,
Palmanque emeritos gloria suscipit:
Tu vivens, superis par, frueris Deo,
Mira sorte beatior.*

* Nobis, summa Trias, parce precantibus,
Da Joseph meritis sidera scandere:
Ut tandem liceat nos tibi perpetim
Gratum promere canticum.

IN NATIVITATE S. JOANNIS
BAPTISTÆ.

AD VESPERAS.

* * *

Nuntius celso veniens olympos,
Te patri magnum fore nasciturum;
Nomen, et vitæ seriem gerendæ,
Omne promittit.

Ille promissi dubius superni,
Perdidit promptæ modulos loquelæ:
Sed reformasti genitus peremptæ
Organa vocis.

Ventris obstruso recubans cubili,
Senserat Regem thalamo manentem:
Hinc parens, nati meritis, uterque
Abdita pandit.

Sit decus Patri, genitæque Proli,
Et tibi compar utriusque virtus
Spiritus semper, Deus unus omni
Temporis ævo.

* Ut queant laxis resonare fibris
Mira gestorum famuli tuorum,
Solve polluti labii reatum,
Sancte Joannes.

AD MATUTINUM.

ANTRA deserti teneris sub annis,
 Civium turmas fugiens, petisti,
 Ne levi posses maculare vitam
 Crimine linguæ.

Præbuit durum tegumen camelus
 Artubus sacris, strophium bidentes;
 Cui latex haustum, sociata pastum
 Mella locustis.

Ceteri tantùm cecinere Vatum
 Corde præsago jubar affuturum;
 Tu quidem mundi scelus auferentem
 Indice prodis.

Non fuit vasti spatium per orbis
 Sanctior quisquam genitus Joanne,
 Qui nefas sæcli meruit lavantem
 Tingere lymphis.

Sit decus Patri, genitæque Proli,
 Et tibi compar utriusque virtus
 Spiritus semper, Deus unus omni
 Temporis ævo.

AD LAUDES.

O NIMIS felix, meritique celsi,
 Nesciens labem nivei pudoris,
 Præpotens martyr, nemorumque cultor,
 Maxime vatium.

Serta ter denis alios coronant
 Aucta clementis, duplicata quosdam;
 Trina te fructu cumulata centum
 Nexibus ornant.*

Laudibus cives celebrent superni,
 Te Deus simplex, pariterque trine,
 Supplices et nos veniam precamur:
 Parce redemptis.

IN FESTO SS. APOSTOLORUM
 PETRI ET PAULI.

AD VESPERAS.

DECORA lux Æternitatis, auream
 Diem beatis irrigavit ignibus,
 Apostolorum quæ coronat principes,
 Reisque in astra liberam pandit viam.

Mundi magister, atque cœli janitor,
 Romæ parentes, arbitrique gentium,
 Per ensis ille, hic per crucis victor
 necem

Vitæ senatum laureati possident.

* Nunc potens nostri meritis opimis
 Pectoris duros lapides revelle,
 Asperum planans iter, et reflexos
 Dirige calles.

Ut pius mundi Sator et Redemptor,
 Mentibus culpæ sine labe puris,
 Ritè dignetur veniens beatos
 Ponere gressus.

O Roma felix, quæ duorum principum
Es consecrata glorioso sanguine :
Horum cruore purpurata ceteras
Excellis orbis una pulchritudines.

Sit Trinitati sempiterna gloria,
Honor, potestas, atque jubilatio,
In unitate quæ gubernat omnia,
Per universa sæculorum sæcula.

IN FESTO
S. MARIÆ MAGDALENÆ.

AD VESPERAS.

PATER superni luminis,
Cùm Magdalenam respicis,
Flammas amoris excitas,
Geluque solvis pectoris.

Amore currit saucia,
Pedes beatos ungere,
Lavare fletu, tergere
Comis, et ore lambere.

Adstare non timet cruci,
Sepulchro inhæret anxia :
Truces nec horret milites :
Pellit timorem charitas.

O vera, Christe, charitas,
Tu nostra purga crimina,
Tu corda reple gratia,
Tu redde cœli præmia.

Patri, simulque Filio,
Tibique sancte Spiritus,
Sicut fuit, sit jugiter,
Sæclum per omne gloria.

AD MATUTINUM.

MARIA castis osculis
Lambit Dei vestigia :
Fletu rigat, tergit comis,
Detersa nardo perlinit.

Deo Patri sit gloria,
Ejusque soli Filio,
Cum Spiritu Paraclito
Nunc, et per omne sæculum.

IN FESTO
S. PETRI AD VINCULA.

AD VESPERAS.

MIRIS modis repentè liber, ferrea
Christo jubente vincla Petrus exuit :
Ovilis ille pastor, et rector gregis,
Vitæ recludit pascua, et fontes sacros,
Ovesque servat creditas, arcet lupos.

Patri perenne sit per ævum gloria,
Tibique laudes concinamus inclytas,
Æterne Nate ; sit superne Spiritus
Honor tibi decusque : sancta jugiter
Laudetur omne Trinitas per sæculum.

IN FESTO
TRANSFIGURATIONIS DOMINI.

AD VESPERAS.

QUICUMQUE Christum quæritis,
Oculos in altum tollite :
Illic licebit visere
Signum perennis gloriæ.

Illustre quiddam cernimus,
Quod nesciat finem pati,
Sublime, celsum, interminum,
Antiquius cœlo et chao.

Hic ille Rex est Gentium,
Populique Rex Judaici,
Promissus Abrahæ Patri,
Ejusque in ævum semini.

Hunc et Prophetis testibus,
Iisdemque signatoribus,
Testatur et Pater jubet
Audire nos et credere.

Jesu, tibi sit gloria,
 Qui te revelas parvulis,
 Cum Patre et almo Spiritu,
 In sempiterna sæcula.

AD LAUDES.

Lux alma Jesu mentium,
 Dum corda nostra recreas,
 Culpæ fugas caliginem,
 Et nos reple dulcedine.

Quàm lætus est quem visitas!
 Consors Paternæ dexteræ,
 Tu dulce lumen patriæ,
 Carnis negatum sensibus.

Splendor Paternæ gloriæ,
 Incomprehensa charitas,
 Nobis amoris copiam
 Largire per præsentiam.

Jesu, tibi sit gloria,
 Qui te revelas parvulis,
 Cum Patre et almo Spiritu,
 In sempiterna sæcula.



IN
DEDICATIONE S. MICHAELIS
ARCHANGELI.

AD VESPERAS.

TE splendor et virtus Patris,
Te vita, Jesu, cordium,
Ab ore qui pendent tuo,
Laudamus inter angelos.

Tibi mille densa millium
Ducum corona militat:
Sed explicat Victor crucem
Michaël salutis signifer.

Draconis hic dirum caput
In ima pellit tartara,
Ducemque cum rebellibus
Cœlesti ab arce fulminat.

Contra ducem superbiæ
Sequamur hunc nos principem,
Ut detur ex Agni throno
Nobis corona gloriæ.

Patri, simulque Filio,
Tibique sancte Spiritus;
Sicut fuit, sit jugiter
Sæclum per omne gloria.

AD LAUDES.

CHRISTE, sanctorum decus angelorum,
Gentis humanæ Sator et Redemptor,
Cœlitum nobis tribuas beatas
Scandere sedes.

Angelus pacis Michaël in ædes
Cœlitus nostras veniat : serenæ
Auctor ut pacis lacrymosa in orcum
Bella releget.

Angelus fortis Gabriel, ut hostes
Pellat antiquos, et amica cœlo,
Quæ triumphator statuit per orbem,
Templa revisat.

Angelus nostræ medicus salutis
Adsit è cœlo Raphaël, ut omnes
Sanet ægrotos, dubiosque vitæ
Dirigat actus.

Virgo dux pacis, genitrixque lucis,
Et sacer nobis chorus angelorum
Semper assistat, simul et micantis
Regia cœli.

Præstet hoc nobis Deitas beata
Patris, ac Nati, pariterque sancti
Spiritus, cujus resonat per omnem
Gloria mundum.



COMMUNE SANCTORUM.

COMMUNE APOSTOLORUM ET EVANGELISTARUM.

AD MATUTINUM.

ÆTERNA Christi munera,
Apostolorum gloriam,
Palmas, et hymnos debitos
Lætis canamus mentibus.

Ecclesiarum principes,
Belli triumphales duces,
Cœlestis aulæ milites,
Et vera mundi lumina.

Devota Sanctorum Fides,
Invicta Spes credentium,
Perfecta Christi Charitas
Mundi tyrannum conterit.

In his Paterna gloria,
In his triumphat Filius,
In his voluntas Spiritus,
Cœlum repletur gaudio.

Patri, simulque Filio,
Tibique sancte Spiritus,
Sicut fuit, sit jugiter
Sæclum per omne gloria.

Tempore Paschali.

AD VESPERAS.

TRISTES erant apostoli
De Christi acerbo funere,
Quem morte crudelissima
Servi necarant impii.

Sermone verax angelus
Mulieribus prædixerat :
Mox ore Christus gaudium
Gregi feret fidelium.

Ad anxios apostolos
Currunt statim dum nuntiæ,
Illæ micantis obvia
Christi tenent vestigia.

Galilææ ad alta montium
Se conferunt apostoli ;
Jesuque, voti compotes,
Almo beantur lumine.

Ut sis perenne mentibus
Paschale Jesu gaudium ;
A morte dira criminum
Vitæ renatos libera.

Deo Patri sit gloria,
Et Filio, qui à mortuis
Surrexit, ac Paraclito,
In sempiterna sæcula.

AD LAUDES, ET PER HORAS.

PASCHALE mundo gaudium
Sol nuntiat formosior,
Cùm luce fulgentem nova
Jesum vident apostoli.

In carne Christi vulnera
Micare tanquam sidera
Mirantur, et quidquid vident
Testes fideles prædicant.

Rex Christe clementissime,
Tu corda nostra posside;
Ut lingua grates debitas
Tuo rependat nomini.

Ut sis perenne mentibus
Paschale Jesu gaudium:
A morte dira criminum
Vitæ renatos libera.

Deo Patri sit gloria,
Et Filio, qui à mortuis
Surrexit, ac Paraclito,
In sempiterna sæcula.

COMMUNE UNIUS MARTYRIS.

Extra Tempus Paschale.

AD VESPERAS.

DEUS, tuorum militum
Sors, et corona, præmium:
Laudes canentes Martyris
Absolve nexu criminis.

Hic nempe mundi gaudia,
Et blanda fraudum pabula,
Imbuta felle deputans
Pervenit ad cœlestia.

Pœnas cucurrit fortiter,
Et sustulit viriliter,
Fundensque pro te sanguinem,
Æterna dona possidet.

Ob hoc precatu supplici
Te poscimus piissime;
In hoc triumpho Martyris
Dimitte noxam servulis.

Laus et perennis gloria
Patri sit atque Filio,
Sancto simul Paraclito,
In sempiterna sæcula.

COMMUNE MARTYRUM.

Tempore Paschali.

AD VESPERAS.

Pro Pluribus Martyribus.

REX gloriose martyrum,
Corona confitentium,
Qui respuentes terrea
Perducis ad cœlestia:

Aurem benignam protinus
Intende nostris vocibus:
Trophæa sacra pangimus,
Ignosce quod deliquimus.

Tu vincis inter martyres,
Parcisque confessoribus:
Tu vince nostra crimina,
Largitor indulgentiæ.

Deo Patri sit gloria,
Et Filio, qui à mortuis
Surrexit, ac Paraclito,
In sempiterna sæcula.

AD MATUTINUM.

CHRISTO profusum sanguinem,
Et martyrum victorias,
Dignamque cœlo lauream
Lætis sequamur vocibus.

74 COMMUNE MARTYRUM.

Terrore victo sæculi,
Pœnisque spretis corporis,
Mortis sacræ compendio
Vitam beatam possident.

Traduntur igni martyres,
Et bestiarum dentibus :
Armata sævit unguis
Tortoris insani manus.

Nudata pendent viscera,
Sanguis sacratus funditur :
Sed permanent immobiles
Vitæ perennis gratia.

Te nunc Redemptor quæsumus,
Ut martyrum consortio
Jungas precantes servulos
In sempiterna sæcula.

COMMUNE
PLURIMORUM MARTYRUM.

Extra Tempus Paschale.

AD VESPERAS.

SANCTORUM meritis inclyta gaudia
Pangamus socii, gestaque fortia :
Gliscens fert animus promere cantibus
Victorum genus optimum.

Hi sunt quos fatuè mundus abhorruit;
 Hunc fructu vacuum, floribus aridum
 Contempsere tui nominis asseclæ,
 Jesu rex bone cœlitum.

Hi pro te furias atque minas truces
 Calcarunt hominum, sævaque verbera;
 His cessit lacerans fortiter ungula,
 Nec carpsit penetralia.

Cæduntur gladiis more bidentium :
 Non murmur resonat, non querimonia :
 Sed corde impavido mens benè conscia
 Conservat patientiam.

Quæ vox, quæ poterit lingua retexere,
 Quæ tu martyribus munera præparas?
 Rubri nam fluido sanguine fulgidis
 Cingunt tempora laureis.

Te summa ô Deitas, unaque poscimus,
 Ut culpas abigas, noxia subtrahas,
 Des pacem famulis, ut tibi gloriam
 Annorum in seriem canant.

COMMUNE CONFESSORUM.

AD VESPERAS.

ISTE Confessor Domini, colentes
 Quem piè laudant populi per orbem,
 Hac die lætus meruit beatas
 Scandere sedes.

Qui pius, prudens, humilis, pudicus,
 Sobriam duxit sine labe vitam,
 Donec humanos animavit auræ
 Spiritus artus.

Cujus ob præstans meritum frequenter
 Ægra quæ passim jacuere membra,
 Viribus morbi domitis, saluti
 Restituuntur.

Noster hinc illi chorus obsequentem
 Concinit laudem, celebresque palmas;
 Ut piis ejus precibus juvemur
 Omne per ævum.

Sit salus illi, decus, atque virtus,
 Qui super cœli solio coruscans,
 Totius mundi seriem gubernat
 Trinus, et unus.

Confessoris Pontificis.

AD LAUDES.

JESU Redemptor omnium,
 Perpes corona præsulum,
 In hac die clementiùs
 Indulgeas precantibus :

Tui sacri qua nominis
 Confessor almus claruit;
 Hujus celebrat annua
 Devota plebs solemnia.

Qui ritè mundi gaudia
Hujus caduca respuens,
Æternitatis præmio
Potitur inter angelos.

Hujus benignus annue
Nobis sequi vestigia :
Hujus precatu servulis
Dimitte noxam criminis.

Sit, Christe Rex piissime,
Tibi, Patrique gloria,
Cum Spiritu Paraclito,
Nunc, et per omne sæculum.

Confessoris non Pontificis.

AD LAUDES.

JESU corona celsior,
Et veritas sublimior,
Qui confitenti servulo
Reddis perenne præmium :

Da supplicanti cœtui,
Hujus rogatu, noxii
Remissionem criminis,
Rumpendo nexum vinculi.

Anni reverso tempore
Dies refulsit lumine,
Quo sanctus hic de corpore,
Migravit inter sidera.

78 COMMUNE VIRGINUM.

Hic vana terræ gaudia,
Et luculenta prædia,
Polluta sorde deputans,
Ovans tenet cœlestia.

Te Christe Rex piissime
Hic confitendo jugiter,
Calcavit artes dæmonum,
Sævumque averni principem.

Virtute clarus et fide,
Confessione sedulus,
Jejuna membra deferens
Dapes supernas obtinet.

Proinde te piissime
Precamur omnes supplices,
Nobis ut hujus gratia
Pœnas remittas debitas.

Patri perennis gloria,
Natoque Patris unice,
Sanctoque sit Paraclito
Per omne semper sæculum.

COMMUNE VIRGINUM.

AD VESPERAS ET AD LAUDES.

Jesu, corona Virginum,
Quem mater illa concipit,
Quæ sola Virgo parturit,
Hæc vota clemens accipe.

Qui pergis inter lilia,
 Septus choreis Virginum,
 Sponsus decorus gloria,
 Sponsisque reddens præmia.

Quocumque tendis, Virgines
 Sequuntur, atque laudibus
 Post te canentes cursitant,
 Hymnósque dulces personant.

Te deprecamur supplices,
 Nostris ut addas sensibus,
 Nescire prorsus omnia
 Corruptionis vulnera.

Virtus, honor, laus, gloria,
 Deo Patri, cum Filio,
 Sancto simul Paraclito,
 In sæculorum sæcula.

COMMUNE
 SANCTÆ MARTYRIS TANTUM,

ET

Nec Virginis nec Martyris.

AD VESPERAS.

FORTEM virili pectore
 Laudemus omnes feminam,
 Quæ sanctitatis gloria
 Ubique fulget inclyta.

Hæc sancto amore saucia,
Dum mundi amorem noxium
Horrescit, ad cœlestia
Iter peregit arduum.

Carnem domans jejuniis,
Dulcique mentem pabulo
Orationis nutriens,
Cœli potitur gaudiis.

Rex Christe virtus fortium,
Qui magna solus efficis,
Hujus precatu quæsumus,
Audi benignus supplices.

Deo Patri sit gloria,
Ejusque soli Filio,
Cum Spiritu Paraclito,
Nunc, et per omne sæculum.



COMMUNE
DEDICATIONIS ECCLESIAE.

AD VESPERAS.

CÆLESTIS urbs Jerusalem,
Beata pacis visio,
Quæ celsa de viventibus
Saxis ad astra tolleris.
Sponsæque ritu cingeris
Mille angelorum millibus.

O sorte nupta prospera,
Dotata Patris gloria,
Respersa sponsi gratia,
Regina formosissima,
Christo jugata principi,
Cœli corusca civitas.

Hîc margaritis emicant,
Patentque cunctis ostia:
Virtute namque prævia
Mortalis illuc ducitur,
Amore Christi percitus
Tormenta quisquis sustinet.

Scalpri salubris ictibus,
Et tunsione plurima;
Fabri polita malleo
Hanc saxa molem construunt,
Aptisque juncta nexibus
Locantur in fastigio.

Decus Parenti debitum
Sit usquequaque Altissimo,
Natoque Patris unico,
Et inclyto Paraclito,
Cui laus, potestas, gloria
Æterna sit per sæcula.

AD LAUDES.

ALTO ex Olympi vertice
 Summi Parentis Filius,
 Ceu monte desectus lapis
 Terras in imas decidens,
 Domus supernæ, et infimæ,
 Utrumque junxit angulum.

Sed illa sedes Cœlitum
 Semper resultat laudibus,
 Deumque Trinum et Unicum
 Jugi canore prædicat:
 Illi canentes jungimur
 Almæ Sionis æmuli.

Hæc templa, Rex cœlestium,
 Imple benigno lumine;
 Huc ô rogatus adveni,
 Plebisque vota suscipe,
 Et nostra corda jugiter
 Perfunde cœli gratia.

Hîc impetrent fidelium
 Voces precesque supplicum,
 Domus beatæ munera,
 Partisque donis gaudeant;
 Donec soluti corpore
 Sedes beatas impleant.

Decus Parenti debitum
 Sit usquequaque Altissimo,
 Natoque Patris unico,
 Et inclyto Paraclito,
 Cui laus, potestas, gloria
 Æterna sit per sæcula.

IN OFFICIO BEATÆ MARLÆ.

AD MATUTINUM.

QUEM terra, pontus, sidera
Colunt, adorant, prædicant,
Trinam regentem machinam,
Clastrum Mariæ bajulat.

Cui luna, sol, et omnia
Deserviunt per tempora;
Perfusa cœli gratia,
Gestant puellæ viscera.

Beata Mater munere,
Cujus, supernus Artifex
Mundum pugillo continens,
Ventris sub arca clausus est.

Beata cœli nuntio,
Fecunda sancto Spiritu,
Desideratus gentibus
Cujus per alvum fusus est.

Jesu, tibi sit gloria,
Qui natus es de Virgine,
Cum Patre et almo Spiritu,
In sempiterna sæcula.

AD LAUDES.

O GLORIOSA Virginum,
Sublimis inter sidera;
Qui te creavit, parvulum
Lactente nutris ubere.

Quod Heva tristis abstulit,
Tu reddis almo germine:
Intrent ut astra flebiles,
Cœli recludis cardines.

Tu regis alti janua,
Et aula lucis fulgida:
Vitam datam per Virginem,
Gentes redemptæ plaudite.

Jesu, tibi sit gloria,
Qui natus es de Virgine,
Cum Patre et almo Spiritu,
In sempiterna sæcula.



EX OFFICIIS PROPRIIS
SANCTORUM ORDINIS MINORUM.

IN FESTO
S. GABRIELIS ARCHANGELI.

AD MATUTINUM.

EN noctis medium; surgite properè,
Cantemus Domino jam nova cantica;
Hac hora Gabriel nam fuit omnibus
Vitæ nuntius optimus.

Hac hora Dominum virginis alveus
Humano generi protulit, insuper
Devictis pariter funditus hostibus
Victor surgit ab inferis.

Surgentes igitur mitibus invicem
Oremus precibus cœlica numina:
Præsertim Dominum, qui dedit angelum
Curam qui gerit omnium.

Quæ virtus hominis promere sufficit,
Quæ mundo Gabriel munera conferat?
Sanctas hic animas visere Dominum
Præstò ducit in æthera.





HYMNI
E BREVIARIO
SARISBURIENSI.





HYMNI.

DE NATIVITATE DOMINI.

AD VESPERAS.

VENI Redemptor gentium,
Ostende partum Virginis,
Miretur omne sæculum,
Talis decet partus Deum.

Non ex virili semine
Sed mystico spiramine
Verbum Dei factum est caro,
Fructusque ventris floruit.

Alvus tumescit Virginis,
Claustra pudoris permanent,
Vexilla virtutum micant,
Versatur in templo Deus.

Procedens è thalamo suo,
Pudoris aula regia,
Geminæ gigas substantiæ
Alacris ut currat viam.

Egressus ejus à Patre,
Regressus ejus ad Patrem,
Excursus usque ad inferos,
Recursus ad sedem Dei.

Æqualis æterno Patri,
Carnis stropheo accingere,
Infirma nostri corporis
Virtute firmans perpetim.

Præsepe jam fulget tuum,
Lumenque nox spirat novum,
Quod nulla nox interpolet,
Fideque jugi luceat.

Deo Patri sit gloria,
Ejusque soli Filio,
Cum Spiritu Paraclito,
Et nunc, et imperpetuum.

IN DIE EPIPHANIÆ DOMINI.

AD LAUDES.

A PATRE Unigenitus
Ad nos venit per Virginem,
Baptisma cruce consecrans
Cunctos fideles generans.

De cœlo celsus prodiit,
Accepit formam hominis,
Facturam morte redimens,
Gaudia vitæ largiens.

Hoc te Redemptor quæsumus
Illabere propitius,
Clarusque nostris sensibus
Lumen præbe fidelibus.

Mane nobiscum Domine,
Noctem obscuram remove,
Omne delictum ablue,
Piam medelam tribue.

Quem jam venisse novimus,
Redire item credimus,
Tu sceptrum tuum inclytum
Tuo defende clypeo.

Gloria tibi Domine,
Qui natus es de Virgine,
Cum Patre et sancto Spiritu,
In sempiterna sæcula.

IN DOMINICA PRIMA
QUADRAGESIMÆ.

AD COMPLETORIUM.

CHRISTE qui lux es et dies,
Noctis tenebras detegis,
Lucisque lumen crederis
Lumen beatum prædicans.

Precamur, sancte Domine,
Defende nos in hac nocte,
Sit nobis in te requies,
Quietem nocte tribue.

Ne gravis somnus irruat,
Nec hostis nos surripiat,
Nec caro illi consentiens
Nos tibi reos statuât.

Oculi somnum capiant,
Cor ad te semper vigilet;
Dextera tua protegat
Famulos qui te diligunt.

Defensor noster aspice,
Insidiantes reprime;
Guberna tuos famulos,
Quos sanguine mercatus es.

Memento nostri Domine,
In gravi isto corpore,
Qui es defensor animæ,
Adesto nobis Domine.

Deo Patri sit gloria,
Ejusque soli Filio,
Cum Spiritu Paraclito,
Et nunc, et imperpetuum.

IN DOMINICA TERTIA QUADRAGESIMÆ.

AD VESPERAS.

Ecce tempus idoneum,
Medicina peccaminum,
Quibus Deum offendimus,
Corde, verbis, operibus.

Qui pius ac propitius
Nobis pepercit hactenus,
Ne nos cum nostris perderet
Tantis iniquitatibus.

Hunc igitur jejuniis,
Cum precibus et lacrymis,
Multisque bonis aliis,
Placemus devotissimi.

Ut nos à cunctis sordibus
Purgans ornet virtutibus,
Angelicis et cœtibus
Conjungat in cœlestibus.

Sit benedictus genitor,
Ejusque Unigenitus,
Cum Spiritu Paraclito,
Trinus et unus Dominus.

AD NOCTURNUM.

CLARUM decus jejunii
Monstratur orbi cœlitus,
Quo Christus auctor omnium
Cibis dicavit abstinens.

Hoc Moyses carus Deo
Legisque lator factus est,
Hoc Heliam per aera
Curru levavit igneo.

Hinc Daniel mysteria
Victor leonum viderat,
Per hoc amicus intimus
Sponsi Johannes claruit.

Hæc nos sequi dona Deus
Exempla parsimoniæ;
Tu robur auge mentium,
Dans spiritale gaudium.

Præsta Pater per Filium,
 Præsta per alium Spiritum,
 Cum his per ævum triplici
 Unus Deus cognomine.

AD LAUDES.

JESU quadragenariæ
 Dicator abstinentiæ,
 Qui ob salutem mentium
 Hoc sanxeras jejunium,

Quo paradiso redderes
 Servata parsimonia,
 Quos inde gastrimargia
 Illecebrosa depulit.

Adesto nunc Ecclesiæ,
 Adesto pœnitentiæ,
 Quæ pro suis excessibus
 Orat profusis fletibus.

Tu retro acta crimina
 Tua remitte gratia,
 Et à futuris adhibe
 Custodiam mitissime.

Ut expiati animis
 Jejuniarum victimis,
 Tendamus ad Paschalia
 Digne colenda gaudia.

Præsta Pater per Filium,
 Præsta per alium Spiritum,
 Cum his per ævum triplici
 Unus Deus cognomine.

IN PASSIONE DOMINI.

AD COMPLETORIUM.

CULTOR Dei memento
Te fontis et lavacri
Rorem subisse sanctum,
Te chrismate innovatum.

Fac, cum vocante somno
Castum petis cubile,
Frontem locumque cordis
Crucis figura signet.

Crux pellit omne crimen,
Fugiunt crucem tenebræ;
Tali dicata signo
Mens fluctuare nescit.

Procul ô procul vagantum
Portenta somniorum,
Procul esto pervicaci
Præstigiator astu.

O tortuose serpens,
Qui mille per mæandros
Fraudesque flexuosas
Agitas quieta corda,

Discede; Christus hic est,
Christus hic est, liquesce;
Signum, quod ipse nosti,
Damnatur tuam catervam.

Corpus licet fatiscens
Jaceat reclive paululum,
Christum tamen sub ipso
Meditabitur sopore.

Gloria æterno Patri
Et Christo vero regi,
Paraclitoque sancto,
Et nunc et imperpetuum.

DOMINICA IN ALBIS.

AD VESPERAS.

CHORUS novæ Hierusalem
Novum meli dulcedinem
Promat, colens cum sobriis
Paschale festum gaudiis.

Quo Christus invictus leo
Dracone surgens obruto,
Dum voce viva personat
A morte functos excitat.

Quam devorarat impius
Prædam refudit tartarus,
Captivitate libera
Jesum sequuntur agmina.

Triumphat ille splendide,
Et dignus amplitudine,
Soli polique patriam
Unam facit rempublicam.

Ipsū canendo supplices
Regem precemur milites,
Ut in suo clarissimo
Nos ordinet palatio.

Per sæcla mente nescia
Patri supremo gloria
Honorque sit cum Filio
Et Spiritu Paraclito.

AD NOCTURNUM.

AURORA lucis rutilat,
Cœlum laudibus intonat,
Mundus exultans jubilat,
Gemens infernus ululat.

Cum Rex ille fortissimus,
Mortis confractis viribus,
Pede conculcans tartara
Solvit à pœna miseros.

Ille, qui clausus lapide,
Custoditur sub milite,
Triumphans pompa nobili
Victor surgit de funere.

Solutis jam gemitibus
Et inferni doloribus,
Quia surrexit Dominus
Resplendens clamat angelus.

Tristes erant apostoli
De nece sui Domini,
Quem pœna mortis crudeli
Servi damnarunt impii.

98 IN TEMPORE PASCHALI.

Quæsumus auctor omnium,
In hoc paschali gaudio,
Ab omni mortis impetu
Tuum defende populum.

Gloria tibi, Domine,
Qui surrexisti à mortuis,
Cum Patre et sancto Spiritu,
Nunc, et per omne sæculum.

IN TEMPORE PASCHALI.

AD COMPLETORIUM.

JESU salvator sæculi,
Verbum Patris altissimi,
Lux lucis invisibilis,
Custos tuorum pervigil,
Tu fabricator omnium,
Discretor atque temporum,
Fessa labore corpora
Noctis quiete recrea.

Ut dum gravi in corpore,
Brevi manemus tempore,
Sic caro nostra dormiat
Ut mens in cœlo vigilet.

Te deprecamur supplices,
Ut nos ab hoste liberes,
Ne valeat seducere
Tuo redemptos sanguine.

Quæsumus auctor omnium,
In hoc Paschali tempore,
Ab omni mortis impetu
Tuum defende populum.

Gloria tibi, Domine,
Qui surrexisti à mortuis,
Cum Patre et sancto Spiritu,
In sempiterna sæcula.

IN VIGILIA ASCENSIONIS.

AD COMPLETORIUM.

Jesu nostra redemptio,
Amor et desiderium,
Deus Creator omnium,
Homo in fine temporum.

Quæ te vicit clementia
Ut ferres nostra crimina,
Crudelem mortem patiens
Ut nos à morte tolleres,

Inferni claustra penetrans,
Tuos captivos redimens,
Victor triumpho nobili
Ad dextram Patris residens.

Ipsa te cogat pietas
Ut mala nostra superes,
Parcendo et voti compotes
Nos tuo vultu facies.

100 IN DIE PENTECOSTES.

Tu esto nostrum gaudium,
Qui es futurus præmium;
Sit nostra in te gloria
Per cuncta semper sæcula.

Gloria tibi Domine,
Qui scandis supra sidera,
Cum Patre et sancto Spiritu,
In sempiterna sæcula.

IN DIE PENTECOSTES,

Et tribus diebus sequentibus.

AD COMPLETORIUM.

ALMA chorus Domini nunc pangat nomina summi,
Messias, Soter, Emmanuel, Sabaoth Adonai,
Est, Unigenitus, Via, Vita, Manus, Homoousion,
Principium, Primogenitus, Sapientia, Virtus,
Alpha, Caput, Finisque simul vocitatur et est Oo,
Fons et Origo boni, Paraclitus, et Mediator,
Agnus, Ovis, Vitulus, Serpens, Aries, Leo, Vermis,
Os, Verbum, Splendor, Sol, Gloria, Lux, et Imago,
Panis, Flos, Vitis, Mons, Janua, Petra, Lapisque,
Angelus, et Sponsus, Pastorque, Propheta, Sacerdos,
Athanatos, Kyrios, theon panton Craton, et Jesus,
Salvificet nos: sit tui sæcla per omnia doxa.

IN FESTO SS. TRINITATIS.

AD LAUDES.

O PATER sancte mitis atque pie,
O Jesu Christe Fili venerande,
Paracliteque Spiritus O alme,
Deus æterne,

Trinitas sancta Unitasque firma,
Deitas vera, Bonitas immensa,
Lux angelorum, salus orphanorum,
Spesque cunctorum,

Serviunt tibi cuncta quæ creasti,
Te tuæ cunctæ laudant creaturæ,
Nos quoque tibi psallimus devote,
Tu nos exaudi.

Gloria tibi omnipotens Deus,
Trinus et unus, magnus et excelsus,
Te decet hymnus, honor, laus et decus,
Nunc, et in ævum.

COMMUNE UNIUS APOSTOLI

VEL PLURIMORUM.

AD VESPERAS.

ANNUE Christe sæculorum Domine,
Nobis per hujus tibi cari merita,
Ut qui te coram graviter deliquimus
Hujus solvamus gloriosis precibus.

102 IN DEDICATIONE ECCLESIAE.

Salva Redemptor plasma tuum nobile,
Signatum sancto vultus tui lumine;
Nec lacerari sinas fraude dæmonum
Propter quos mortis exsolvistis pretium.

Noli captivos esse tuos servulos,
Absolve reos, compeditos erige,
Et quos cruore redemisti proprio
Rex bonæ tecum fac gaudere perpetim.

Sit tibi Jesu, benedicte Domine,
Gloria, virtus, honor, et imperium,
Una cum Patre, sanctoque Paraclito,
Cum quibus regnas Deus ante sæcula.

IN DEDICATIONE ECCLESIAE.

AD LAUDES.

ANGULARE fundamentum
Lapis Christus missus est,
Qui compage parietis
In utroque nectitur,
Quem Sion sancta suscepit,
In quo credens permanet.

Omnis illa Deo grata
Et dilecta civitas
Plena modulis in laude
Et canore jubilo,
Trinum Deum Unicumque
Cum favore prædicat.

Hoc in templo, summe Deus,
Exoratus adveni,
Et clementi bonitate
Precum vota suscipe;
Largam benedictionem
Hic infunde jugiter.

Hic promereantur omnes
Petita acquirere,
Et adepta possidere,
Cum sanctis perenniter
Paradisum introire
Translati in requiem.

Gloria et honor Deo
Usquequo altissimo,
Una Patri Filioque
Inclyto Paraclito,
Cui laus est et potestas
Per æterna sæcula.

IN FESTIS DUPLICIBUS.

AD COMPLETORIUM.

SALVATOR mundi, Domine,
Qui nos salvasti hodie,
In hac nocte nos protege,
Et salva omni tempore.

Adesto nunc propitius
Et parce supplicantibus,
Tu dele nostra crimina,
Tu tenebras illumina.

Ne mentem somnus opprimat,
Nec hostis nos surripiat,
Nec ullis caro petimus
Commaculetur sordibus.

Te reformatior sensuum
Votis precamur cordium,
Ut puri castis mentibus
Surgamus à cubilibus.

Deo Patri sit gloria,
Ejusque soli Filio,
Cum Spiritu Paraclito,
Et nunc, et imperpetuum.

DE SANCTO VINCENTIO.

AD LAUDES.

CHRISTI miles gloriosus
Levita Vincentius
Ut tribunal sponte rogam
Conscendit intrepidus,
Cujus salis crepitantis
Per corpus municiaë

Sparsim ibant atque prunæ
Vernabantur sanguine.
Inter hæc manet immotus
Ille Dei famulus,
Orans Christum in sublime
Erectis luminibus.

Gloria et honor Deo
Usquequo altissimo,
Una Patri Filioque
Inclyto Paraclito,
Cui laus est et potestas
Per æterna sæcula.

IN VISITATIONE BEATÆ
MARIÆ.

AD VESPERAS.

FESTUM Matris gloriosæ
Plebs sancta concelebret,
Pietatis viscerosæ
Gratiam expostulet
Qua cognata copiosè
Sensit hic Elisabeth.

Fœcundatæ senectutis
Sterilem aggreditur
Quæ divinæ jam virtutis
Mater clam efficitur,
Gratulatur cum salutis
Consortem alloquitur.

Mox non loquens exultavit
Ad Verbi præsentiam,
Sed Elizabeth expavit
Matris excellentiam,
Benedictaque clamavit
Fructus affluentiam.

Unde mihi quisquam putet
 Hoc, ait, præsagium,
 Ut devote me salutet
 Mater Regis omnium;
 Ventris mei fructum mutet
 In novum tripudium?

Virgo dum sic commendatur,
 Canticum lætitiæ
 Psallens pure gloriatur
 In amore gratiæ,
 Quo beata prædicatur
 In omni progenie.

Trine Deus, summe pie,
 Regnans æternaliter,
 Prece Virginis Mariæ
 Nos conserva jugiter,
 Ut post finem hujus viæ
 Vivamus perenniter.

AD NOCTURNUM.

MUNDI salus affutura,
 Virgo Mater inclyta,
 Gestu simplex, mente pura,
 Specie præfulgida,
 Cum cœlesti genitura
 Processit in publica.

Caput conterens draconis,
 Rubus qui non uritur,
 Aaron virga, Gedeonis
 Vellus quod perfunditur,
 Hæc perfecta Salomonis
 Quæ beata dicitur.

Genitrix Emmanuelis
Virga Jesse floruit,
Ostium Ezechielis
Quod viro non patuit,
Monsque lapis Danielis
Statuam comminuit.

Sic in mundo præter morem
Notum fecit Dominus,
Castis Mater conditorem
Circumdat visceribus,
Terra gignit salvatorem
Nubibus pluentibus.

Virgo cara charitatis
Fervens desiderio
Castæ consanguinitatis
Favet ministerio,
Gaudens hujus novitatis
Sancto puerperio.

Felix domus Zachariæ
Talem habens hospitem,
Felix cognata Mariæ
Quam suscepit comitem,
Sed Johannis et Messiæ
Tu distingue limitem.

Laus sit summo genitori,
Qui regnat per omnia,
Laus sit nostro Redemptori,
Per quem venit gratia,
Procedenti Creatori
Sit æqualis gloria.

DE S. MARIA MAGDALENA.

AD VESPERAS.

COLLAUDEMUS Magdalenæ
Lacrymas et gaudium,
Sonent voces laude plenæ
De concentu cordium,
Ut concordet philomenæ
Turturis suspirium.

Jesum quærens convivarum
Turbas non erubuit,
Pedes unxit, lacrymarum
Fluvio quos abluit,
Crine tersit, et culparum
Veniam promeruit.

Suum lavit mundatorem,
Rivo fons immaduit,
Pium fudit flos liquorem,
In ipsum reffloruit,
Cælum terræ dedit rorem,
Terra cælum compluit.

In prædulci mixtione
Nardum ferens pisticum,
In unguenti fusione
Typum gessit mysticum,
Ut sanetur unctione
Unxit ægra medicum.

Pie Christus hanc respexit
 Speciali gratia,
 Quia multum hunc dilexit
 Dimittuntur vitia,
 Christi quando resurrexit
 Facta est prænuntia.

Gloria et honor Deo
 Qui Paschalis hostia,
 Agnus morte, pugna leo,
 Victor die tertia
 Resurrexit cum trophæo
 Mortis ferens spolia.

AD NOCTURNUM.

ÆSTIMAVIT ortolanum,
 Et hoc sane credidit,
 Seminavit enim granum
 Quod in mentem cecidit,
 Linguam novit et non manum,
 Linguam Christus indidit.

Non agnovit figurali
 Latentem imagine,
 Mentis agrum spiritali
 Excolentem semine,
 Sed cum eam speciali
 Designavit nomine.

Hæc à Jesu Jesum quærit
 Sublatum conqueritur,
 Jesum intus mentem gerit,
 Jesus præsens quæritur,
 Mentem colit, mentem serit
 Jesus, nec percipitur.

Jesu bone, Jesu pie,
 Quid te monstrans latitas?
 Quid occultas te Mariæ,
 Mentem cujus habitas?
 Intus plena vero die
 Nescit nisi veritas.

O quam mirè Jesu ludis
 His quibus diligeris!
 Sed cum ludis non illudis,
 Nec fallis nec falleris,
 Sed excludis quos includis
 Notus non agnosceris.

Gloria et honor tibi,
 Spes, vita, lux animæ,
 Per quem sperant se proscribi
 Libro mortis pessimæ,
 Præstent sibi nos ascribi
 Peccatricis lacrymæ.

AD LAUDES.

O MARIA noli flere,
 Jam non quæras alium,
 Ortolanus hic est vere
 Et colonus mentium,
 Intra mentis ortum quære
 Mentis operarium;

Unde planctus et lamentum?
 Quid mentem non erigis?
 Quid revolvis monumentum?
 Tecum est quem diligis;
 Jesum quæris, et inventum
 Habes, nec intelligis.

Unde gemis? unde ploras?
Verum habes gaudium,
In te latet quod ignoras
Doloris solatium,
Intus habes, quæris foras
Languoris remedium.

Jam non miror si nescisti
Magistrum dum seminat,
Semen, quod est verbum Christi
Te magis illuminat,
Et Rabboni respondisti
Cum Mariam nominat.*

Gloria et honor Deo,
Cujus profert gratia
Invitanti Pharisæo
Mariæ suspiria,
Cœnam vitæ qui dat reo
Gratiæ post prandia.

- * Pedes Christi, quos lavisti
Fonte lota gratiæ,
Quem ab ipso recepisti
Funde rorem veniæ,
Resurgentis quem vidisti
Fac consortes gloriæ.



IN TRANSFIGURATIONE
DOMINI.

AD VESPERAS.

CŒLESTIS formam gloriæ,
Quam spes quærit Ecclesiæ,
In monte Christus indicat,
Quo supra solem emicat.

Res memoranda sæculis;
Hic cum tribus discipulis
Cum Moyse et Helia
Grata promit eloquia.

Assistunt testes gratiæ
Legis atque prophetiæ,
De nube testimonium
Sonat Patris ad Filium.

Glorificata facie
Christus claret hodie,
Queis sit honor credentium
Deo piè fruendum.

Visionis mysterium
Corde levat fidelium,
Unde solenni gaudio
Clamat nostra devotio.

Pater cum Unigenito
Et Spiritu Paraclito
Unus nobis hanc gloriam
Largire per præsentiam.

AD MATUTINUM.

O SATOR rerum, reparator ævi,
Christe, rex regum, metuende censor,
Ad preces nostras pariterque laudes
Aspice gratis.

Noctis incursu tibi vota laudum
Pangimus, præsta tibi sint ut apta,
Nosque concentu refove perennis
Luminis auctor.

Inter Heliam Moysenque vates,
Ut jubar solis faciem refulgens,
Candida veste nivis instar albæ
Tu micuisti.

Tu Dei Patris Patre teste proles
Cum sis sanctorum decus angelorum
Tu salus mundi, via, vita, virtus
Crederis esse.

Gloria, virtus sit tibi Creator,
Cuncta qui solus retinens gubernas,
In throno regni sine fine regnans
Trinus et unus.

AD LAUDES.

O NATA lux de lumine,
Jesu Redemptor sæculi,
Dignare clemens supplicum
Laudes precesque sumere.

Qui carne quondam contegi
 Dignatus es pro perditis,
 Nos membra confer effici
 Tui beati corporis.

Præ sole vultu flammeus,
 Ut nix amictu candidus,
 Tu monte dignis testibus
 Apparuiſti conditor.

Vates alumnis abditos
 Tuis alumnis conferens
 Utrisque te divinitus
 Deum dedisti credere.

Te vox paterna cœlitus
 Suum vocavit Filium,
 Quem nos fideli pectore
 Regem fatemur gloriæ.

Concede nobis quæsumus
 Almis micare moribus,
 Ut ad polorum gaudia
 Bonis vehamur actibus.

Laudes tibi nos pangimus
 Æterne regum rex Deus,
 Qui es trinus et unus Deus
 Per cuncta regnans sæcula.



IN ASSUMPTIONE BEATÆ
MARIÆ VIRGINIS.

AD SECUNDAS VESPERAS.

Lætabundus
Exultet fidelis chorus.
Alleluia.

Regem regum
Intacte profudit thoros;
Res miranda.

Angelus consilii
Natus est de virgine,
Sol de stella.

Sol occasum nesciens,
Stella semper rutilans,
Semper clara.

Sicut sidus radium,
Profert virgo filium
Pari forma;

Neque sidus radio,
Neque mater filio
Fit corrupta.

Cedrus alta Libani
Conformatur hysopo
Valle nostra.

116 IN FESTO S. MICHAELIS.

Verbum ens altissimi
Corporari passum est
Carne sumpta.

Esayas cecinit,
Synagoga meminit,
Nunquam tamen desinit
Esse cœca.

Si non suis vatibus
Credat, vel gentilibus
Sibyllinis versibus
Hæc prædicta.

Infelix propera,
Crede vel vetera,
Cur damnaberis
Gens misera.

Quem docet litera
Natum considera
Ipsam genuit puerpera.

IN FESTO S. MICHAELIS.

AD VESPERAS ET AD HORAS.

TIBI Christe, splendor Patris,
Vita, virtus cordium,
In conspectu angelorum
Votis, voce psallimus.
Alternantes, concrepantes,
Melos damus vocibus.

Collaudemus venerantes
 Omnes cœli milites,
 Sed præcipue primatem
 Cœlestis exercitus,
 Michaellem in virtute
 Conterentem Zabulon.

Quo custode procul pelle,
 Rex Christe piissime,
 Omne nefas inimici,
 Mundo corde et corpore
 Paradiso redde tuo
 Nos sola clementia.

Gloriam Patri melodis
 Personemus vocibus,
 Gloriam Christo canamus,
 Gloriam Paraclito,
 Qui Deus trinus et unus
 Extat ante sæcula.

IN FESTO OMNIUM SANCTORUM.

AD VESPERAS ET NOCTURNUM.

JESU salvator sæculi,
 Redemptis ope subveni,
 Et pia Dei genitrix
 Salutem posce miseris.

Coetus omnes Angelici
 Et Patriarcharum cunei,
 Et Prophetarum merita
 Nobis precentur veniam.

Baptista Christi prævius,
 Et claviger æthereus,
 Cum cæteris apostolis,
 Nos solvant nexu criminis.

Chorus sacratus Martyrum,
 Confessio sacerdotum,
 Et Virginalis castitas
 Nos à peccatis abluant.

Clericorum suffragia
 Omnesque cives cœlici
 Annuant votis supplicum
 Et vitæ poscant præmium.

Laus, honor, virtus, gloria
 Deo Patri et Filio,
 Sancto simul Paraclito
 In sempiterna sæcula.

AD LAUDES.

CHRISTE, Rédemptor omnium,
 Conserva tuos famulos,
 Beatæ semper Virginis
 Placatus sanctis precibus.

Beata quoque agmina
 Cœlestium spirituum,
 Præterita, præsentia,
 Futura mala pellite.

Vates æterni judicis,
 Apostolique Domini,
 Suppliciter exposcimus
 Salvare vestris precibus.


Martyres Dei inclyti,
 Confessoresque lucidi,
 Vestris orationibus
 Nos ferte in cœlestibus.

Chorus sanctarum Virginum,
 Clericorumque omnium,
 Simul cum sanctis omnibus,
 Consortes Christi facite.

Mentem auferte perfidam
 Credentium de finibus,
 Ut Christo laudes debitas
 Persolvamus alacriter.

Gloria Patri ingenito,
 Ejusque Unigenito,
 Una cum sancto Spiritu
 In sempiterna sæcula.







HYMNI
E BREVIARIO
EBORACENSI.





HYMNI.

IN NATIVITATE DOMINI.

AD COMPLETORIUM.

CORDE natus ex parentis
Ante mundi exordium,
Alpha et oo cognominatus,
Ipse fons et clausula
Omnium quæ sunt, fuerunt,
Quæque post futura sunt
Sæculorum sæculis.

Ecce quem vates vetustis
Concinebant sæculis,
Quem prophetarum fideles
Paginæ spoponderant,
Emicat promissus olim,
Cunctaque collaudent Deum
Sæculorum sæculis.

O beatus ortus ille,
Virgo cum puerpera
Edidit nostram salutem
Fœta sancto Spiritu,
Et puer Redemptor orbis
Os sacratum protulit
Sæculorum sæculis.

Psallat altitudo cœli,
 Psallant omnes angeli,
 Quicquid est virtutis usquam
 Psallat in laudem Dei,
 Nulla linguarum silescat,
 Vox et omnis personet
 Sæculorum sæculis.

Te senes, et te juvenus,
 Parvulorum te cohors,
 Turba matrum, virginumque,
 Simples puellulæ,
 Voce concordēs pudicis
 Perstrepant concentibus
 Sæculorum sæculis.

Tibi Christe sit, cum Patre,
 Agioque Spiritu,
 Hymnus, melos, laus perennis,
 Gratiarum actio,
 Honor, virtus, et victoria,
 Regnum, æternaliter
 Sæculorum sæculis.

AD PRIMAM.

AGNOSCAT omne sæculum
 Venisse vitæ præmium;
 Post hostis asperi jugum
 Apparuit redemptio.

Esayas quæ præcinit
 Completa sunt in Virgine;
 Annunciavit angelus,
 Sanctus replevit Spiritus.

Gloria tibi, Domine,
Qui natus es de Virgine,
Cum Patre et sancto Spiritu,
In sempiterna sæcula.

AD TERTIAM.

MARIA ventre concepit
Verbi fideli semine,
Quem totus orbs non bajulat
Portant puellæ viscera.

Radix Jessæ jam floruit,
Et virga fructum edidit,
Fœcunda partum protulit,
Et Virgo mater permanet.

Gloria tibi, Domine,
Qui natus es de Virgine,
Cum Patre et sancto Spiritu,
In sempiterna sæcula.

AD SEXTAM.

PRÆSEPE poni pertulit
Qui lucis auctor extitit,
Cum Patre cœlos condidit,
Sub matre pannis induit.

Legem dedit qui sæculo,
Cujus decem præcepta sunt,
Dignando factus est homo
Sub legis esse vinculo.

Gloria tibi, Domine,
Qui natus es de Virgine,
Cum Patre et sancto Spiritu,
In sempiterna sæcula.

AD NONAM.

ADAM vetus quod polluit
Adam novus hoc abluit:
Tumens quod ille dejecit
Humillimus hic erigit.

Jam nata lux est et salus,
Fugata nox, et victa mors;
Venite gentes credite;
Deum Maria protulit.

Gloria tibi, Domine,
Qui natus es de Virgine,
Cum Patre et sancto Spiritu,
In sempiterna sæcula.

DOMINICA TERTIA
QUADRAGESIMÆ.

SABBATO AD VESPERAS.

JAM ter quaternis trahitur
Horis dies ad vespas,
Occasum sol pronuntiat
Noctis redire tempora.

Nos ergo signo Domini
Tutamur claustra pectoris,
Ne serpens ille callidus
Intrandi tentet aditus.

Sed armis pudicitiae
Mens fulta vigil libere,
Sobrietate comite
Hostem repellat improbum.

Sed nec ciborum crapula
Tandem distendat corpora,
Ne vi per somnum animam
Ludificatam polluat.

Præsta beata Trinitas,
Concede simplex Unitas,
Ut fructuosa sint tuis
Jejuniorum munera.

IN ASCENSIONE DOMINI.

AD MATUTINUM.

HYMNUM canamus gloriæ,
Hymni novi nunc personent,
Christus novo cum tramite
Ad Patris ascendit thronum.

Apostoli tunc mystico
In monte stantes chrismatis,
Cum matre clara Virgine,
Jesu videbant gloriam.

Quos alloquētes angeli,
 Quid astra stantes cernitis?
 Salvator hic est, inquiunt,
 Jesus triumpho nobili.

Sicque venturum asserunt,
 Quemadmodum hunc viderunt
 Summa polorum culmina
 Scandere Jesum splendida.

Da nobis illuc sedula
 Devotione tendere,
 Quo te sedere cum Patre
 In arce regni credimus.

Tu esto nostrum gaudium,
 Qui es futurus præmium;
 Sit nostra in te gloria
 Per cuncta semper sæcula.

Gloria tibi, Domine,
 Qui scandis supra sidera,
 Cum Patre et sancto Spiritu,
 In sempiterna sæcula.

FERIA II. PENTECOSTES.

AD COMPLETORIUM.

LAUDES Deo devotas
 Dulci voce ac sonora
 Plebs resultet Catholica.
 Spiritus sancti gratia
 Apostolis die hodierna
 In igneis linguis est effusa.

Paracliti præsentia
 Emundet nos à peccati macula
 Pura sibi aptans habitacula,
 Charismatum et munera
 Pectoribus nostris pius infundat,
 Vita nostra ei ut complaceat
 Per sæculorum sæcula.
 Conclamemus alleluia,
 Sit Deo laus, potestas,
 Honor, virtus, et gloria.

IN FESTO SS. APOSTOLORUM
 PETRI ET PAULI.

AD PRIMAS VESPERAS.

FELIX per omnes festum mundi cardines
 Apostolorum præpollet alacriter
 Petri beati, Pauli sacratissimi,
 Quos Christus almo consecravît sanguine,
 Ecclesiarum deputavit principes.

Hi sunt olivæ duæ coram Domino,
 Et candelabra luce radiantia,
 Præclara cœli duo luminaria,
 Fortia solvunt peccatorum vincula,
 Portas Olympi reserunt fidelibus.

Habent supernas potestatem claudere
 Sermone sedes, pandere splendentia
 Limina poli super alta sidera,
 Linguae eorum claves cœli factæ sunt,
 Larvas repellunt ultra mundi limitem.

Petrus beatus catenarum laqueos
 Christo jubente rupit mirabiliter
 Custos ovilis, et doctor Ecclesiæ,
 Pastorque gregis, conservator ovium,
 Arcet luporum truculentam rabiem.

Quodcumque vinculis super terram strinxerit
 Erit in astris religatum fortiter;
 Et quod resolvit in terris arbitrio
 Erit solutum super cœli radium;
 In fine mundi judex erit sæculi.

Non impar Paulus huic, doctor gentium,
 Electionis templum sacratissimum,
 In morte compar, in corona particeps,
 Ambo lucernæ et decus ecclesiæ
 In orbe claro coruscant vibramine.

O Roma felix, quæ tuorum principum
 Es purpurata pretioso sanguine,
 Excellis omnem mundi pulchritudinem,
 Non laude tua sed sanctorum meritis,
 Quos cruentatis jugulasti gladiis.

Vos ergo modo gloriosi martyres,
 Petre beate, Paule mundi lilium,
 Cœlestis aulæ triumphales milites,
 Precibus almis vestris nos ab omnibus
 Munite malis, ferte super æthera.

Gloria Deo per immensa sæcula;
 Sit tibi nate decus et imperium,
 Honor, potestas, sanctoque Spiritui;
 Sit Trinitati salus individuæ
 Per infinita sæculorum sæcula.

IN FESTO
S. MARIÆ MAGDALENÆ.

AD VESPERAS.

LAUDA, mater Ecclesia,
Lauda Christi clementiam
Qui septem purgat vitia
Per septiformem gratiam.

Maria soror Lazari,
Quæ tot commisit crimina,
Ab ipsa fauce tartari
Redit ad vitæ limina.

Ægra currit ad medicum
Vas ferens aromaticum,
Ita morbo multiplici
Verbo curatur medici.

Contriti cordis unctio,
Cum lachrymarum fluvio,
Et pietatis actio
Ream solvit à vitio.

Post fluxæ carnis scandala,
Fit ex lebete phiala,
In vas translata gloriæ
De vase contumeliæ.

Surgentem cum victoria
Jesum vidit ab inferis,
Prima meretur gaudia
Quæ plus audebat cæteris.

Uni Deo sit gloria
Pro multiformi gratia,
Qui culpas et supplicia
Remittit et dat præmia.

AD LAUDES.

ÆTERNI Patris Unice,
 Nos pio vultu respice,
 Qui Magdalenam hodie
 Vocas ad thronum gloriæ.

In thesauro recondita
 Regis est drachma perdita,
 Gemmaque lucet inclyta
 Ex luto luci reddita.

Jesu dulce refugium,
 Spes una pœnitentium,
 Per peccatricis meritum
 Peccati solve debitum.

Nos vitiorum stimuli
 Jugi vexant instantia,
 Et blandimentis sæculi
 Corrumpunt lenocinia.*

Uni Deo sit gloria
 Pro multiformi gratia,
 Qui culpas et supplicia
 Remittit, et dat præmia.

* Libet, nec licet libere
 Tibi pro voto psallere,
 Dum mens ægra sub miseræ
 Carnis gemiscit onere.

Pia mater et humilis,
 Naturæ memor fragilis,
 Nos rege tuis precibus
 In hujus vitæ fluctibus.



PROSÆ
E MISSALI
PARISIENSI.





PROSÆ
E MISSALI PARISIENSI.

IN EPIPHANIA DOMINI.

Ad Jesum accurrite,
Corda vestra subdite
Regi novo gentium.

Stella Christum prædicat,
Intus fides indicat
Redemptorem omnium.

Huc afferte munera
Voluntate libera,
Sed munera cordium.

Hæc erit gratissima
Salvatori victima,
Mentis sacrificium.

Aurum offert caritas,
Et myrrham austeritas,
Et thus desiderium.

Auro rex agnoscitur,
Homo myrrha, colitur
Thure Deus gentium.

136 IN PRÆSENTATIONE DOMINI.

Judæa, gaudentibus
Non invidere gentibus
Retectum mysterium.

Post custodes ovium
Se Magi fidelium
Jungunt in consortium.

Qui Judæos advocat
Christus, gentes convocat
In unum tugurium.

Bethleem fit hodie
Totius Ecclesiæ
Nascentis exordium.

Regnet Christus cordibus,
Et victis rebellibus
Proferat imperium.

IN PRÆSENTATIONE DOMINI.

Ave plena gratia,
Cujus inter brachia
Se litat Deo Deus.

Fac me templum visere
Tibi fas occurrere,
Amor, O Jesu, meus.

Est in templo Dominus,
Angeli stant cominus;
Nil in cœlis amplius.

Habet Deus hominem,
Et parentem Virginem,
Cœlo templum ditius.

Spirant sacra gaudium;
Mane sacrificium
Plausus inter redditur.

Vespertinum fletibus,
Et amaris questibus
In cruce miscebitur.

Hæc jam est oblatio
Cujus omnes pretio
Deo restituimur.

Jam non nobis dediti,
Tibi, Deus, subditi,
Vivimus et morimur.

Nunc dimitte famulos:
Nil tenet hic oculos;
Da te palam cernere.

Si jubes hic vivere,
Da cum Jesu crescere,
Da per hunc resurgere.

IN DIE SANCTO PASCHÆ.

VICTIMÆ Paschali

Laudes immolent Christiani: Agnus
redemit oves; Christus innocens
Patri reconciliavit peccatores.

138 IN ASCENSIONE DOMINI.

Mors et vita duello confluxere mirando :
dux vitæ mortuus, regnat vivus.

Dic nobis, Maria,
Quid vidisti in via?

Sepulchrum Christi viventis,
Et gloriam vidi resurgentis.

Angelicos testes,
Sudarium, et vestes.

Surrexit Christus, spes mea ; præcedit
vos in Galilæam.

Scimus Christum surrexisse à mortuis vere :

Tu nobis victor Rex miserere.

IN ASCENSIONE DOMINI.

SOLEMNIS hæc festivitas
Novum instaurat gaudium,
Qua perennis felicitas
Proponitur in præmium.

Christus scandens in æthera
Mortis fregit potentiam ;
Sedens Patris in dextera
Jugem parat lætitiā.

Dies per multos sæpius
Suis vivus apparuit ;
Et comitum cor durius
Mitis magister arguit.

Suos per gentes imperat
Ferre salutis nuntium,
Sed non prius quam afferat
Dei virtus auxilium.

Discipulis mirantibus
Cœlo triumphans redditur,
Et subductus aspectibus
Nube clara suscipitur.

Qui penetravit inferas
Domos Redemptor pacifer,
Se fert in sedes superas
Mundi supremus arbiter.

Ab ascendente ducitur
Regnatura captivitas:
Palma victis asseritur,
Mortuis immortalitas.

Ut ascendit sic veniet
Sedens in nubis solio;
Pœna malos afficiet
Judex bonosque præmio.

Patri monstrat assidue
Quam dura tulit vulnera:
Et sic pacis perpetuæ
Nobis exorat fœdera.

Nunc animis accipite
Paratum cœlo præmium,
Ut membrorum cum capite
Arctius sit consortium.

Quos hic orphanos deseris,
Jesu, respice cœlitus;
Mitte nobis e superis
Promissa dona Spiritus.

Tibi devotis mentibus
Per te luceat veritas,
Per te succensis cordibus
Divina flagret caritas.

IN DIE SANCTO
PENTECOSTES.*

VENI Sancte Spiritus,
Et emitte cœlitus
Lucis tuæ radium.

Veni Pater pauperum,
Veni dator munerum,
Veni lumen cordium.

Consolator optime,
Dulcis hospes animæ,
Dulce refrigerium.

In labore requies,
In æstu temperies,
In fletu solatium.

O lux beatissima,
Reple cordis intima
Tuorum fidelium.

Sine tuo numine,
Nihil est in homine,
Nihil est innoxium.

* Habetur et in Rom.

Lava quod est sordidum,
Riga quod est aridum,
Sana quod est saucium.

Flecte quod est rigidum,
Fove quod est frigidum,
Rege quod est devium.

Da tuis fidelibus
In te confidentibus
Sacrum septenarium.

Da virtutis meritum,
Da salutis exitum,
Da perenne gaudium.

IN FESTO S. SACRAMENTI.*

LAUDA Sion Salvatorem,
Lauda ducem et pastorem
In hymnis et canticis,
Quantum potes tantum aude
Quia major omni laude,
Nec laudare sufficis.

Laudis thema specialis,
Panis vivus et vitalis
Hodie proponitur.
Quem in sacræ mensa cœnæ
Turbæ fratrum duodenæ
Datum non ambigitur.

* Habetur et in Rom.

Sit laus plena, sit sonora,
 Sit jucunda, sit decora
 Mentis jubilatio.
 Dies enim solemnis agitur,
 In qua mensæ prima recolitur
 Hujus institutio.

In hac mensa novi regis
 Novum Pascha novæ legis
 Phase vetus terminat.
 Vetustatem novitas,
 Umbram fugat veritas,
 Noctem lux eliminat.

Quod in cœna Christus gessit,
 Faciendum hoc expressit
 In sui memoriam.
 Docti sacris institutis,
 Panem, vinum; in salutis
 Consecramus hostiam.

Dogma datur Christianis,
 Quod in carnem transit panis,
 Et vinum in sanguinem.
 Quod non capis, quod non vides,
 Animosa firmat fides,
 Præter rerum ordinem.

Sub diversis speciebus,
 Signis tantum, et non rebus,
 Latent res eximiæ:
 Caro cibus, sanguis potus;
 Manet tamen Christus totus
 Sub utraque specie.

A sumente non concisus,
 Non confractus, non divisus,
 Integer accipitur.

Sumit unus, sumunt mille;
Quantum isti tantum ille,
Nec sumptus consumitur.

Sumunt boni sumunt mali,
Sorte tamen inæquali
Vitæ vel interitus.
Mors est malis, vita bonis;
Vide paris sumptionis
Quam sit dispar exitus.

Fracto demum sacramento,
Ne vacilles, sed memento
Tantum esse sub fragmento
Quantum toto tegitur.
Nulla rei fit scissura;
Signi tantum fit fractura,
Quæ nec status, nec statura
Signati minuitur.

Ecce panis angelorum,
Factus cibus viatorum,
Vere panis filiorum,
Non mittendus canibus.
In figuris præsignatur,
Cum Isaac immolatur:
Agnus Paschæ deputatur,
Datur manna patribus.

Bone pastor, panis vere,
Jesu, nostri miserere;
Tu nos pasce, nos tuere,
Tu nos bona fac videre
In terra viventium.
Tu, qui cuncta scis et vales,
Qui nos pascis hic mortales,
Tuos ibi commensales,
Cohæredes et sodales
Fac sanctorum civium.

IN ANNUNCIATIONE
DOMINI.

HUMANI generis
Cessent suspiria;
Beata miseris
Affert hic nuntia
Dies mortalibus.

Unius scelere
Cuncti cecidimus;
Lapsos erigere
Venit Altissimus
De cœli sedibus.

Delectæ Virgini
Quæ Deum pariat,
Angelus Domini
Salutis nuntiat
Nostræ mysterium.

O beatissima
Præ mulieribus,
Virgo castissima,
Deum visceribus
Suscipe filium.

Virtute Spiritus
In sinu Virginis,
Innocens penitus
A labe criminis
Caro compingitur.

Per hanc infantibus
 Lactescit teneris
 Ille qui mentibus
 Panis à superis
 In cœlis editur.

Quod sine tempore
 De Patre nascitur,
 Mortali corpore
 Verbum induitur,
 Ut salvet hominem.

Corpus hoc offeret
 In sacrificium;
 Servos ut liberet,
 Totum, in pretium
 Effundet sanguinem.

Errabam devius
 Exul à patria,
 Semitæ nescius
 Ad vera gaudia
 Per quam regrediar.

In mea Dominus
 Venit exilia,
 Viæque terminus
 Ipse fit, et via;
 Tutus hac gradiar.

O Veritas latens
 Sub velo corporis,
 Sed oculis patens
 Mundati pectoris,
 Tu nos illumina.

Et tu pro miseris
 Supplica numini,
 Quæ te dum asseris
 Ancillam Domini,
 Fis mundi domina.

IN FESTO SS. DIONYSII EPISCOPI,
RUSTICI, ET ELEUTHERII
MARTYRUM.

EXULTET Ecclesia,
Dum triumphat Gallia
Patre Dionysio.
Exultet uberius
Felici Parisius
Illustris martyrio.

Dies festus agitur
Quo trium recolitur
Martyrum victoria:
Quorum patrocínio
Tota gaudet regio,
Regni stat potentia.

Juxta patrem positi
Bellatores inclyti,
Digni sunt memoria.
Sed illum præcipue
Recolit assidue
Regalis Ecclesia.

Hic à summo præsule
Directus in Galliam,
Non gentis incredulæ
Veretur insaniam.

Gallorum apostolus
Venerat Lutetiam,
Quam tenebat subdolus
Hostis velut propriam.

Hic constructo Christi templo,
 Verbo docet et exemplo,
 Coruscat miraculis.
 Turba credit, error cedit,
 Fides crescit, et clarescit
 Nomen tanti præsulis.

His auditis fit insanus
 Imperator inhumanus,
 Mittitque Sisinnium,
 Qui pastorem animarum,
 Fide, vita, signis clarum,
 Trahat ad supplicium.

Infliguntur cœni pœnæ,
 Flagra, carcer, et catenæ,
 Invicta sed constantia
 Tormenta vincit omnia :
 Recordatus emensorum
 Fortis athleta laborum,
 Per nova gaudens prælia
 Æterna quærit præmia.

Immolati vir beatus
 Agni carne saginatus,
 Et præsentis roboratus
 Ad certamen numine ;
 Quam sermone prædicavit,
 Mille signis quam probavit,
 Hanc signare festinavit,
 Fuso fidem sanguine.

Prodit martyr conflicturus,
 Sub securi stat securus,
 Ferit lictor,
 Sicque victor
 Consummatur gladio.

Administri quī sacrorum
Consortes fiunt laborum,
Consecrantur,
Coronantur,
Uno tres martyrio.

Tam præclara passio
Repleat nos gaudio.

IN FESTO OMNIUM
SANCTORUM.

SPONSA Christi quæ per orbem
Militas Ecclesia,
Prome cantus, et sacratos
Dic triumphos cœlitum.

Hæc dies cunctis dicata,
Mixta cœli gaudiis:
Læta currat, et solemni
Personet melodia.

Laureatum ducit agmen
Juncta Mater Filio,
Sola quæ partu pudorem
Virgo nunquam perdidit.

Mox sequuntur angelorum
Administri spiritus,
Siderumque conditori
Mille laudes concinunt.

His Joannes, vate major,
 Præco Christi prævius,
 Patriarchæ cum prophetis,
 Accinunt dulci melo.

Principes sacri senatus,
 Orbis almi judices,
 Sedibus celsis sublimes
 Facta pendunt omnium.

Prodigi vitæ cruore
 Purpurati martyres,
 Auspicati morte vitam,
 Pace gaudent perpeti.

Turba sacra confitentum,
 Cum Levitis præsules,
 Sæculi luxu rejecto,
 Perfruuntur gloria.

Pompa nuptialis, agno
 Consecratæ virgines,
 Liliis rosisque sponsum
 Æmulantur prosequi.

Omnibus sors hæc beata,
 Gloriam Deo dare,
 Et potentem confiteri,
 Terque sanctum dicere.

Cœlites, o vos beati,
 Quos Deus felicitat,
 Supplicum votis adeste
 Et favete singuli.

Hausta fonte liberali
 Dona, terris fundite:
 Pace nostris in diebus
 Obtinete perfrui.

Ut Deo cum sanctitate
 Serviamus subditi,
 Gloriæ post hac futuri
 Quam tenetis compotes.

IN MISSA DEFUNCTORUM.

DIES iræ, dies illa
 Solvet sæclum in favilla,
 Teste David cum Sibylla.

Quantus tremor est futurus
 Quando iudex est venturus,
 Cuncta stricte discussurus!

Tuba mirum spargens sonum
 Per sepulcra regionum,
 Coget omnes ante thronum.

Mors stupebit et natura
 Cum resurget creatura
 Judicanti responsura.

Liber scriptus proferetur,
 In quo totum continetur,
 Unde mundus judicetur.

Judex ergo cum sedebit,
 Quidquid latet apparebit,
 Nil inultum remanebit.

Quid sum miser tunc dicturus?
 Quem patronum rogaturus?
 Cum vix justus sit securus.

Rex tremendæ majestatis,
Qui salvandos salvas gratis,
Salva me, fons pietatis.

Recordare, Jesu pie,
Quod sum causa tuæ viæ,
Ne me perdas illa die.

Quærens me, sedisti lassus;
Redemisti crucem passus:
Tantus labor non sit cassus.

Juste judex ultionis,
Donum fac remissionis
Ante diem rationis.

Ingemisco tanquam reus,
Culpa rubet vultus meus;
Supplici parce, Deus.

Peccatricem absolvisti,
Et latronem exaudisti;
Mihi quoque spem dedisti.

Preces meæ non sunt dignæ,
Sed tu bonus fac benigne
Ne perenni cremer igne.

Inter oves locum præsta;
Et ab hædis me sequestra,
Statuens in parte dextra.

Confutatis maledictis,
Flammis acribus addictis,
Voca me cum benedictis.

Oro supplex et acclinis,
Cor contritam quasi cinis,
Gere curam mei finis.

Lacrymosa dies illa,
Qua resurget ex favilla
Judicandus homo reus,
Huic ergo parce, Deus.

Pie Jesu Domine,
Dona eis requiem.

IN DOMINICA IN PALMIS.*

GLORIA, laus, et honor tibi sit rex Christe redemptor :
Cui puerile decus prompsit Hosanna pium.

Israël es tu Rex, Davidis et inclyta proles :
Nomine qui Domini rex benedicte venis.
Gloria, &c.

Cœtus in excelsis te laudat cœlicus omnis,
Et mortalis homo, et cuncta creata simul.
Gloria, &c.

Plebs Hebræa tibi cum palmis obvia venit :
Cum prece, voto, hymnis, adsumus ecce tibi.
Gloria, &c.

Hi tibi passuro solvebant munia laudis :
Nos tibi regnanti pangimus ecce melos.
Gloria, &c.

Hi placuere tibi, placeat devotio nostra :
Rex bone, rex clemens, cui bona cuncta placent
Gloria, &c.

* Hymnus e Missali Romano.

MISSA DE SEPTEM DOLORIBUS

B. M. VIRGINIS.

STABAT Mater dolorosa,
Juxta crucem lacrymosa,
Dum pendebat Filius;
Cujus animam gementem,
Contristantem et dolentem,
Pertransivit gladius.

O quam tristis et afflicta
Fuit illa benedicta
Mater unigeniti,
Quæ mœrebat et dolebat
Et tremebat, cùm videbat
Nati pœnas inclyti.

Quis est homo qui non fleret,
Christi matrem si videret
In tanto supplicio:
Quis posset non contristari
Piam matrem contemplari,
Dolentem cum Filio!

Pro peccatis suæ gentis,
Vidit Jesum in tormentis,
Et flagellis subditum:
Vidit suum dulcem Natum
Morientem, desolatum,
Dum emisit spiritum.

Eia Mater, fons amoris,
Me sentire vim doloris,
Fac ut tecum lugeam:

Fac ut ardeat cor meum
In amando Christum Deum,
Ut sibi complaceam.

Sancta Mater, istud agas,
Crucifixi fige plagas
Cordi meo validè:
Tui nati vulnerati,
Jam dignati pro me pati,
Pœnas mecum divide.

Fac me verè tecum flere,
Crucifixo condolere,
Donec ego vixero:
Juxta crucem tecum stare,
Te libenter sociare
In planctu desidero.

Virgo virginum præclara,
Mihi jam non sis amara,
Fac me tecum plangere;
Fac ut portem Christi mortem,
Passionis ejus sortem
Et plagas recolere.

Fac me plagis vulnerari,
Cruce hac inebriari,
Ob amorem Filii.
Inflammatum et accensum
Per te, Virgo, sim defensum
In die judicii.

Fac me cruce custodiri,
Morte Christi præmuniri,
Confoveri gratia.
Quando corpus morietur,
Fac ut animæ donetur,
Paradisi gloria.



PROSÆ
E PROCESSIONALI
EBORACENSI.





PROSÆ
E PROCESSIONALI EBORACENSI.

IN DIE PASCHÆ.

SALVE festa dies, toto venerabilis ævo,
Qua Deus infernum vicit et astra tenet.
Salve, &c.

Ecce renascentis testatur gratia mundi
Omnia cum Domino dona redisse suo.
Salve, &c.

Tempora florigero rutilant distincta sereno
Et majore poli lumine porta patet.
Salve, &c.

Altius ignivomum solem cœli orbita ducit,
Qui vagus Oceani exit et intrat aquas.
Salve, &c.

Jamque triumphanti post tristia tartara Christo
Undique fronde nemus, gramina flore favent.
Salve, &c.

Legibus inferni oppressis super astra meantem
 Laudent rite Deum lux, polus, astra, fretum.
Salve, &c.

Qui crucifixus erat Deus ecce per omnia regnat,
 Dantque Creatori cuncta creata preces.
Salve, &c.

Nobilitas anni, mensium decus, alme dierum,
 Horarum splendor, scrupula cuncta patent.
Salve, &c.

Christe salus rerum, bone conditor atque redemptor
 Unica progenies ex Deitate patris.
Salve, &c.

Qui genus humanum cernens mersisse profundo,
 Ut hominem eriperes, es quoque factus homo.
Salve, &c.

IN ASCENSIONE DOMINI.

SALVE festa dies, toto venerabilis ævo,
 Qua Deus ad cœlos scandit et astra tenet.
Salve, &c.

Qui paucis postquam surrexerat ipse diebus
 Pectora confirmans, discipulos solidas.
Salve, &c.

Atque potestatem laxandi crimina præstans,
 Discipulos pariter posse ligare dedit.
Salve, &c.

Ite meum nomen per totum gentibus orbem,
Dicite credentibus notificare Deum.

Salve, &c.

Et qui crediderit, et quem baptismatis unda
Tinxerit in Christi nomine, salvus erit.

Salve, &c.

Quem mittam vobis, vos spiritus ille docebit
In linguis variis omnia posse loqui.

Salve, &c.

Post modicum veniet qui suggerit omnia vobis,
Et visurus eum vado parare locum.

Salve, &c.

Hoc cum dixisset cunctis cernentibus illum
Nubes suscepit eum dum super astra meat.*

Salve, &c.

IN DIE PENTECOSTES.

SALVE festa dies, toto venerabilis ævo,
Qua Deus de cœlo gratia fulsit humo.

Salve, &c.

Spiritus ecce Deus privatoque quo ejus
Ignis adest specie discipulis hodie.

Salve, &c.

Mentibus humanis infudit opes deitatis,
A Patre procedens mystica dona ferens.

Salve, &c.

* Delenda esse videtur vox *eum*.

Non cessat variis Christi magnalia linguis
Plebs benedicta loquens gentibus omnigenis.
Salve, &c.

Laus tibi, vitæ pneuma sacrum, fons, lux animarum,
Omnia vivificans semper et irradians.
Salve, &c.

Pax, Deus, omne bonum, dulcis concordia morum,
Reple corda tuo munere mellifluo.
Salve, &c.

Poscimus, omnipotens, mare, terras, sidera replens,
Nos tibi purifica, protege, vivifica.
Salve, &c.*

Nostra pie tangat seraphin carbunculus ora,
Ut mens perpetuo flagret amore tuo.
Salve, &c.

IN FESTO CORPORIS CHRISTI.

SALVE festa dies, toto venerabilis ævo,
Qua Deus Ecclesiam dicat honore suam.
Salve, &c.

Ecce dies læta, post tristia tartara spreta,
Gratia succedit, perdita vita redit.
Salve, &c.

* Intima Domine ad prægustate sophiæ
Qua redolet Cherubin prædictus ordo Dei.

Hoc corpus Christi, salvans de funere tristi,
Manna figuravit, litera prisca canit.
Salve, &c.

Hoc verbum Patris cœli formator et orbis
Cum Patre cuncta creat et deitate beat.
Salve, &c.

Angelis est panis summa refecto sacris,
Sed sensu vanis nil valet iste panis.
Salve, &c.

Hoc corpus verum firmans primordia rerum,
Infera confregit atque redempta regit.
Salve, &c.

Laudem complacuit, carnem sine semine sumpsit,
Virginis et matris viscera sacra replet.
Salve, &c.

In cœna residens, corpus cum sanguine sumens,
Discipulos pavit, mystica dona dedit.
Salve, &c.

Intactæ matris natus, sapientia Patris,
Constat in altari victima vera Dei.
Salve, &c.

In cruce regnavit, moriens mortem superavit,
Et mundi maculas sanguis et unda lavit.
Salve, &c.

Palmas extendit, vitam pro morte rependit,
Post triduum surgens, corpus ad alta vehens.
Salve, &c.

Perpetuam requiem tu fons et origo bonorum,
Hunc servando chorum da sine nocte diem.
Salve, &c.

IN DEDICATIONE ECCLESIAE.

SALVE festa dies, toto venerabilis ævo,
Qua sponso sponsa jungitur Ecclesia.
Salve, &c.

Hæc est aula Dei, pacis locus et requiei,
Hic et eunt inopes ad Salomonis opes.
Salve, &c.

Filius ille David qui nos sibi consociavit,
Hac in matre domo et Deus est et homo.
Salve, &c.

Copula cœlestis vos spiritualiter estis,
Si servando fidem esse velitis idem.
Salve, &c.

Urbs nova Hierusalem descendens spiritualementem
Attulit ornatum lucis ab arce datum.
Salve, &c.

Hinc fidei fructum sacro baptismo ductum
Dat Rex justitiæ cœlitus Ecclesiæ.
Salve, &c.

Firma David turris, huc si pede perpetue curris,
Invenies in ea pignora siderea.
Salve, &c.

Hæc est arca Dei credentibus auxiliatrix,
Quæ vehit ad portum quos vehit unda maris.
Salve, &c.

HYMNUS IN VIGILIA PASCHÆ.

E Processionali Eboracensi.

INVENTOR rutili Dux bone luminis,
Qui certis vicibus tempora dividis,
Merso sole chaos ingruit horridum,
Lumen redde tuis Christe fidelibus.

Inventor rutili, &c.

Quamvis innumero sidere regiam
Lunarique polum lampade pinxeris,
Incussu silicis lumina nos tamen
Monstrans saxigeno semine quærere.

Inventor, &c.

Tu lux vera oculis, lux quoque sensibus,
Intus tu speculum, tu speculum [et] fons
Lumen quod famulus offero suscipe,
Tinctum pacifice chrismatis virgine.

Inventor, &c.

Per Christum genitum summe Pater tuum,
In quo visibilis stat tibi gloria,
Quo noster Dominus qui tuus unicus
Spirat de Patrio corde Paraclitum.

Inventor, &c.

Per quem splendor, honor, laus, sapientia,
Majestas, bonitas, et pietas tua
Regnum continuat numine triplici
Texens perpetue sæcula sæculis.



LEICESTER :
PRINTED BY T. COMBE AND CO.

J. H. PARKER, OXFORD;

AND

RIVINGTONS, LONDON.

NEW EDITIONS.

18mo. 5s.

GODLY MEDITATIONS

UPON THE

MOST HOLY SACRAMENT OF THE LORD'S SUPPER.

BY CHRISTOPHER SUTTON, D. D.

A NEW EDITION.

EDITED BY THE REV. J. H. NEWMAN, B. D.

Fellow of Oriel College.

18mo. 3s.

DISCE MORI. LEARNE TO DYE.

BY CHRISTOPHER SUTTON, D. D.

A NEW EDITION.

Edited by the Rev. E. H. DEWAR, M. A. of Exeter College,
and the Rev. C. DAMAN, M. A. of Oriel College.

18mo. 4s.

THE GOLDEN GROVE:

A Guide to Devotion.

**BY JEREMY TAYLOR, D. D. BISHOP OF DOWN AND
CONNOR.**

With an Engraving of the Golden Grove in Carmarthenshire.

J. H. PARKER, OXFORD;
AND RIVINGTONS, LONDON.

18mo. 3s. 6d.

HEART'S EASE,

Or a Remedy against all Troubles. With a Consolatory Discourse, particularly directed to those who have lost their friends and dear relations.

BY SIMON PATRICK, D. D.

LATE LORD BISHOP OF ELY.

In this edition the work is reprinted entire, as published by the author.

18mo. 3s. 6d.

ADVICE TO A FRIEND;

BY SIMON PATRICK, D. D.

LATE LORD BISHOP OF ELY.

18mo. 3s. 6d.

ARCHBISHOP LAUD'S DEVOTIONS;

EDITED BY THE REV. F. W. FABER, B. A.

FELLOW OF UNIVERSITY COLLEGE.

24mo. 3s. 6d.

HYMNI ECCLESIAE.

The Latin Text of the Hymns from the Paris Breviary.

WITH A PREFACE BY THE REV. J. H. NEWMAN, B. D.
Fellow of Oriel College.

J. H. PARKER, OXFORD;
AND RIVINGTONS, LONDON.

18mo. 4s.

SACRA PRIVATA :

OR PRIVATE MEDITATIONS, DEVOTIONS, AND
PRAYERS.

BY THOMAS WILSON, D. D.
BISHOP OF SODOR AND MAN.

In this edition the work is reprinted entire, as published by the Author, for the use of the Clergy. All the editions published of late years are "accommodated to general use," by the omission of a large portion of the work.

12mo. 4s.

SERMONS

ON THE MINISTRY AND ORDINANCES OF THE
CHURCH OF ENGLAND.

By the Right Rev. Father in God,
WILLIAM BEVERIDGE, D. D.
BISHOP OF ST. ASAPH.

12mo. 5s.

**VINCENTII LIRINENSIS
COMMONITORIUM.**

Vincentius of Lirins' Commonitory for the Antiquity and Universality of the Catholic Faith against the Profane Novelties of all Heretics.

J. H. PARKER, OXFORD;
AND RIVINGTONS, LONDON.

IN THE PRESS.

18mo.

SELECTIONS FROM THE WORKS OF
RICHARD HOOKER.

Edited by the Rev. JOHN KEBLE, M. A. Professor of Poet.
late Fellow of Oriel College.

12mo.

BERTRAMI PRESBYTERI DE CORPORI
ET SANGUINE DOMINI LIBER.

The Book of Bertram the Priest touching the
Body and Blood of Christ.

Revised from the old translations, with an introduction.

18mo.

A RATIONALE,
OR PRACTICAL EXPOSITION OF THE BOOK OF
COMMON PRAYER,
BY BISHOP SPARROW.



